

Xojon carta-la San Pablo xi kiskii ítjòn-la xita naxandá-la Cristo xi títsajna Corinto

Kó tsò Pablo nga síhixat'aà jñà xita naxandá-la Cristo xi títsajna Corinto

1 ¹ʼAn xi 'mì-na Pablo, xi xó k'oas'ín kinokjoà-na nga 'an tsibíxáya-na Cristo Jesús, nga k'oas'ín kjòmejèn-la Nainá. Títsanìhixat'aà-nòjen kò Sóstenes xi 'ndseeé chibá ít'aà ts'e Cristo. ²Tìkjiì-nò xojon carta jè, jñò xi naxandá-la Cristo maà xi títsajnaà ján Corinto, xi jye kisìtsjeè-nò Nainá nga ya títsakjòòkòo Cristo Jesús nga xó k'oas'ín jaàjiìn-nò Nainá mé-ne nga xita tsjeè-la komaà kò ngats'iì xita xi xki xi ján chjat'aà-la nga jeya síkíjna jè Na'èn-ná Jesucristo xi otíxoma-ná, tíkoà jè otíxoma-la xita koi. Xi Na'èn-ná 'mì-lá, tíkoà Na'èn-ná tsò-la jñà xita koi. ³Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya ijiìn inima-nò.

'Én xi kiìchja Pablo nga tsjá-la kjondaà Nainá

⁴Kjit'aà nàchrjein tsjaà-la kjondaà Nainá xi ít'aà tsajòn koií kjoa-la jñà kjondaà xi kitsjaà-nò Nainá nga ndaà kisichikon-t'in-nò ít'aà ts'e Cristo Jesús. ⁵Nga yaà ít'aà ts'e Cristo, Nainá kisichikon-t'in yije kjohítsjeèn-la inima-nò, kós'ín nokjoà, kò kós'ín machiya-nò 'én-la Nainá. ⁶Nga k'oaa s'ín 'ya-la, nga jè 'én ndaà-la Nainá xi kjoa ts'e Cristo kjòkixiyaá ijiìn inima-nò. ⁷Nimé kjotjò-la Nainá chijat'aà-nò k'e nga tákó títsachiñá-la nga kjoí l'jngòò k'a Jesucristo xi otíxoma-ná. ⁸Nainá tsjá-nò nga'ño skanda k'e nga kjoehet'aà

nachrjein, mé-ne nga nímé jé sakòt'aà-nò k'e nga kitjojen ijngòd k'a Jesucristo xi otíxoma-ná. ⁹Nainá xitá kixi-né, síkitasòn-né koni s'ín tsjá 'én-la. Xó k'oaá s'ín kiichja-nò nga ya chraña kitsajnakjoòkoo Jesucristo xi ki'ndí-la tsò-la nga jè otíxoma-ná.

Mé-ne kjòjòya-ne naxandá-la Cristo ján Corinto

¹⁰Ndí 'ndsè ko tichjaá, it'aà ts'e okixi xi kitsjaà-na Jesucristo xi otíxoma-ná, tìbitsi'bà-nò ngats'ioò, ngàsòn ngáya titsajnakoo xinguiòo, mé-ne nga mì kojòya-ne kjohítsjeèn-nò. Tajngòd kjohítsjeèn tikjeén, ngàsòn jchòsòn-là nitá mé kjoa-ne. ¹¹Koií koxan-nò ndí 'ndsè, nga jñà xitá ni'ya-la Cloé, tsibénqjmí-na nga kjoasiì tjín-nò. ¹²Koií k'oas'ín tixan-nò, tjín i'nga xitá xinguiáá xi tsò: “An, jé Pablo fit'aà-la.” Tjín xi tsò: “An, jè Apolos fit'aà-la.” Tjín xi tsò: “An, jè Cefas [xi tikoá Pedro 'mì] fit'aà-la.” Tjín xi tsò: “An, jè Cristo fit'aà-la.” ¿Mé-ne obixón-nò? ¹³¿A kjìn ya ma-ne Cristo? ¿Majìn! ¿A jè Pablo xi kisit'aà krò it'aà tsajòn? ¿Majìn! ¿A it'aà ts'eé Pablo komà bautizar? ¿Majìn! ¹⁴Ndaà chjí-la Nainá, 'an, mìtsà yá xitá kis'iaàn bautizar ya naxandá tsajòn, ta jè Crispo ko Gayo, ¹⁵mé-ne nga mì yá xitá kitso-ne: “It'aà ts'eé Pablo komà bautizar.” ¹⁶Saá tíbítsjeèn-na nga tikoá kis'iaàn bautizar Estéfanos ko xitá xíkjín, tanga mìkìi bítsjeèn-na tsà kis'iaàn bautizar xi kj'eíí xitá. ¹⁷Jè Cristo mìtsà koi xá kisikasén-na nga xitá s'iaàn bautizar; koií xá kisikasén-na nga 'an kichjaya 'én ndaà-la Nainá. K'e nga chjaya, mìtsà 'én-la xitá chjine síkjeén; majìn-na nga chija nga'ñó-la krò-la Cristo.

Jè Cristo, nga'ñó-la Nainá-né ko kjoachjine-la Nainá-né

¹⁸Jñà 'én xi tínokjoáya it'aà ts'e Cristo nga k'en-t'aà krò, ta kjoa ská ma-la jñà xitá xi ya tjímaya ndiyá-la i'nde kjo'in. Tanga jñá xi jye titsabitjokàjñaá kjo'in, k'oaá s'ín mokjeiín-ná nga jè 'én-la Cristo nga'ñó-la Nainá-né. ¹⁹K'oaá s'ín tíchja Xojon-la Nainá nga tsò:

Jñà xitá xi 'ñó tjín-la kjoa chjine,
 'aán kokoò-la nga nímé chjí-la kjoachjine-la.
 'Aán kochrjeènguia kjohítsjeèn-la
 jñà xitá xi 'ñó machiya-la.

²⁰Jñà x̄it̄a xi 'ñó t̄jín-là kjoachjine, k̄o xi 'ñó ch̄jine xojon k̄o xi joóya-ne kjoa xi t̄jín isò'nde, i'nde, çñánda t̄ítsajnak̄o kjoachjine-là? Jè Nainá, kisiskáya-là kjoachjine xi t̄jín-là x̄it̄a isò'nde. ²¹Nainá 'ñó x̄it̄a ch̄jine, mìkìl kitsjaa'nde-là x̄it̄a nga it'aà ts'e kjoachjine-là isò'nde kijtseèxkon. Nainá k'oaá s'ín sasén-là nga ochrjekàjìn kjo'in jñà xi mokjeiín-là it'aà ts'e 'én ndaà-là Nainá xi kjoa ts'e Cristo, 'én xi tsò-là x̄it̄a koi, kjoa ská-né.

²²Jñà x̄it̄a judío [mìkìl mokjeiín-là] nga jé xi mejèn-là nga skoe kjoaxkón xi 'ñó jeya t̄jín, k̄o jñà xi mìtsà x̄it̄a judío [t̄ikoaá mìkìl mokjeiín-là] nga koií ótsji xi 'ñó kjoa ch̄jine. ²³Tanga ngajen k'oaá s'ín nokjoàya-jen nga krò k'en-t'aà Cristo [x̄it̄a xi xó kisikasén-ne Nainá]. Jñà x̄it̄a judío mìkìl mokjeiín-là kjoa xi komàt'in Cristo, k̄o jñà xi mì x̄it̄a judío, kjoa ská ma-là. ²⁴Tanga jñà x̄it̄a xi xó jaàjìn-ne Nainá, xi x̄it̄a judío k̄o xi mìtsà x̄it̄a judío, k'oaá s'ín mokjeiín-là nga jè Cristo nga'ñó-là Nainá-né k̄o kjoa ch̄jine-là Nainá-né. ²⁵Kjoa-là Nainá xi ta kjoa ská tsò-là x̄it̄a isò'nde, kjoa ch̄jine-là Nainá-né. Ísaá tse kjoachjine t̄jín-là mì k'oaá-ne koni kjoachjine xi t̄jín-là x̄it̄a isò'nde. K̄o jè kjoa-là Nainá xi ta kjoa indaà tsò-là x̄it̄a isò'nde, nga'ñó-là Nainá-né. Ísaá tse nga'ñó t̄jín-là mì k'oa-ne koni nga'ñó xi t̄jín-là x̄it̄a isò'nde.

²⁶Jñò ndí 'ndsè k̄o ndí tichjaá, t̄ikítsjeèn k'e nga sa jaàjìn-nò Nainá, chibaá ma-nò xi x̄it̄a ch̄jine tsò-nò x̄it̄a isò'nde, k̄o chibaá ma-nò xi x̄it̄a ítjòn t̄ítsajnaà, t̄ikoa chibaá ma-nò xi ya ni'ya-là x̄it̄a sko-là kits'iòn. ²⁷Tanga Nainá jaàjìn jñà x̄it̄a xi tsò-là x̄it̄a isò'nde nga chiba kjoht̄sjeèn t̄jín-là mé-ne kosobà-là jñà x̄it̄a ch̄jine. T̄ikoa jaàjìn Nainá xi tsò-là x̄it̄a isò'nde nga n̄imé ch̄jí-là mé-ne kosobà-là jñà x̄it̄a xi x̄it̄a ítjòn t̄ítsajna. ²⁸Nainá jaàjìn x̄it̄a ima k̄o x̄it̄a xi bitjongui xi tsò-là x̄it̄a isò'nde nga n̄imé ch̄jí-là, mé-ne kitjongui-ne jñà x̄it̄a xi tsò nga jñà t̄ítsajna ítjòn, ²⁹mé-ne nijngòò x̄it̄a xi 'nga s̄iikíjna-ne yijo-là nga nguixkon Nainá. ³⁰Tanga t̄ijè-ne Nainá kisikítsajnak̄o-ná Cristo Jesús. K'oaá t̄is'ín kis'iìn nga it'aà ts'e Cristo sakó-ná jè kjoachjine, nga jè Cristo, x̄it̄a kixi s'ín-ná, x̄it̄a tsjeè s'ín-ná k̄o síkítsajnandej̄í-ná kjoa ts'e jé-ná. ³¹Koni s'ín t̄ichja Xojon-là Nainá nga tsò: “Jè xi jeya síkíjna yijo-là, ta saá Nainá jeya k̄atasíkíjna.”

2 ¹Ndí 'ndsè kò tichjaá, k'e nga kiikon-nò nga tsibenojmí-nò 'én-la Nainá, mìtsà koi 'én kichjà-nò xi maxkón-la xitá k'e nga 'nchré kò xi tsò-la nga 'én-la xitá chjine. ²K'e nga tsohótijnako-nò, k'oaá s'ín kiskoòsòn-la; mìtsà mé kjoa xi kj'eíí kisikítsjeèn; nguì tà 'én-la Jesucristo tsibenojmí-nò, nga jè-né xi krò k'en-t'aà. ³K'e nga ijchò kènojmí-nò 'én-la Nainá, indaàkjoaá ijchoa. Titsakjoòn-ná skanda tíhotsé-ná. ⁴K'e nga kichjàyajiìn-nò mìtsà 'én-la xitá chjine kisikjeén mé-ne nga kòkjeiìn-nò. Ta saá jè Inima Tsjeè-la Nainá tsakó nga'ñó-la nga kòkjeiìn-nò. ⁵Mé-ne jè kjoa xi mokjeiìn-nò it'aà ts'e Cristo, mìtsà ya nchrobá-ne kjoa chjine-la xitá, yaá nchrobá-ne nga'ñó-la Nainá.

Xi nguì kjoa chjine, it'aà ts'eé Nainá nchrobá-ne

⁶Kixií kjoa 'én chjineé nokjoàya-lajen jñà xitá xi jye tímajchínga nga mokjeiìn-la it'aà ts'e Cristo. Tanga mìtsà kjoa chjine ts'e isò'nde nokjoàya-jen, nì mìtsà ts'e xitá ítjòn xi tjín isò'nde xi jye tíchija nga'ñó-la. ⁷Én xi nokjoàya-jen, kjoa chjine ts'e Nainá-né, jè kjoachjine xi tjí'ma-la xi k'oas'ín kiskoòsòn-la skanda tisa kjòtseé nga jñá jeya kitsajnaá. ⁸Njingoò xitá ítjòn xi tjín isò'nde kjòchiya-la it'aà ts'e kjoa chjine koi. Tsà kjòchiya-la, mì-là kiì k'oas'ín krò kisik'en-t'aà Na'è-ná Jesucristo xi tjín-la kjoa jeya. ⁹Xojon-la Nainá, k'oaá s'ín tíchja nga tsò:

Jñà xitá xi matsjakeè Nainá,

jè tjíndaà-la kjoa xi nì saá jngoò xitá xi xkon beè-ne,
xi líká-la 'nchré-ne

xi kò inima-la machiya-la.

¹⁰Nainá, it'aà ts'e Inima Tsjeè-la tsakó-najen kjoa koi. Nga jè Inima Tsjeè-la Nainá ótsjiya yije-né skanda jñà kjoa xi mikii ndaà fiya-ná it'aà ts'e Nainá.

¹¹¿Yá xitá-ne xi machiya-la kó tsò kjohítsjeèn xi tjíin inima-la xitá xi kj'eíí? Tà jè tjíin inima-la kó tsò kjohítsjeèn-la. K'oaá tís'ín tjín kjoa ts'e Nainá, njingoò xitá tjíin-la kó tsò kjohítsjeèn-la Nainá; ta jè Inima Tsjeè-la tjíin-la. ¹²Ngajen, mìtsà jè inima-la xitá isò'nde kitjoé-najen. Jè Inima Tsjeè-la Nainá kitjoé-najen, mé-ne nga jcha-najen kjoa xi Nainá kitsjaà kjotjò-ná. ¹³Én koi, k'oaá s'ín nokjoà-jen koni s'ín okóya-najen Inima Tsjeè-la Nainá. Mìtsà kjohítsjeèn

ts'e xit̩a isò'nde. 'Én Tsjeè-la Nainá bènojmi-jen xi kjoa ts'e Inima Tsjeè-la.

¹⁴Jè xi mitsà xit̩a-la Cristo, mìkiì machiya-la 'én xi ts'e Inima Tsjeè-la Nainá. Tà kjoa ská ma-la. Mìkiì fahas'en-jìin-la, nga mochjeén-né nga it'aà ts'e Inima Tsjeè-la Nainá kinchátsjiyaá. ¹⁵Tanga jè xit̩a xi Inima Tsjeè-la Nainá tijnajìin inima-la, maá-la ótsjiya yije nit̩a mé kjoa-ne. Tanga it'aà ts'e xit̩a jè, mì yá xit̩a xi koma-la kohótsjiya kjohítsjeèn-la. ¹⁶K'oaá s'ín tichja Xojon-la Nainá nga tsò: “¿Yá-né xi beè kjohítsjeèn-la Nainá? ¿Yá-né xi koma kokòya-la?” Tanga jñá tjin-ná kjohítsjeèn xi ts'e Cristo.

Jñá xit̩a xi síxá it'aà ts'e Nainá ján Corinto

3 ¹Jñò ndí 'ndsè kò tichjaá, mìkiì komà kos'ín kichjàkò-nò koni xit̩a xi ndaà tjiin inima-la Inima Tsjeè-la Nainá. Ta k'oaá s'ín kichjàkò-nò koni tsà taxkì xit̩a isò'nde xi tà kjoa ts'e yijo-la ótsji, koni tsà tákó ndí ixti xó xi it'aà ts'e Cristo. ²Mitsà 'in tjin 'én xi tsakoòya-nò; k'oaá s'ín ngaya-la koni ndí ixti xó xi sa nchihoki, tà tsjin 'biì, mìtsà tsojmì tájaà kine. Jñò, kj'eè kii ndaà fahas'en-jìin-nò 'én-la Nainá, k'oaá ngaya-la koni tsojmì tájaà xi kj'eè kii ma chine skanda nachrjein i'ndeì. ³Tákó k'oaá s'ín 'nè koni s'ín xit̩a xi kjoa ts'e yijo-la ótsji. Machinicha-nò xinguioo, chitiya-nò nit̩a mé kjoa-ne. Kjoa koi, kjoa ts'e xit̩a isò'nde-né. ⁴K'e nga bixón: “'An, xit̩a ts'e Pablo-ná”, kò jè xi ijngò tsò: “'An, xit̩a ts'e Apolos-ná”, jñò, k'oaá s'ín nokjoà koni chja xi taxkì xit̩a isò'nde.

⁵'An xi Pablo 'mì-na, kò Apolos, tà xit̩a chi'nda-nájen xi nixá-lajen Nainá. It'aà tsajeén kòkjeiín-nò 'én-la Nainá, nga ijngò ijngò-jen ki'nè-jen xá xi Na'èn-ná kisingatsja-najen. ⁶'Aán tsakoòya-nò 'én-la Nainá, k'oaá ngaya-la koni jngò xit̩a xi bitje xojmá, jè Apolos kiskinindá-la, tanga jè Nainá tísjchá. ⁷Mitsà jè xit̩a xi bitje tsojmì, ni mìtsà jè xi kinindá-la xi chjí-la, ta jngò jè Nainá xi síjchá tsojmì xi sitje xi 'ñó chjí-la. ⁸Jè xi bitje kò xi kinindá-la, ta jngò xá tjin-ne xi s'ín. Tanga jè Nainá tsjá-la chjí-la koni tjin xá xi kis'iin nga jngò ijngò. ⁹Ngajen, yaá taña nixákjoè-jen xá-la Nainá. Koa jñò-nò i'nde ñánda sitje 'én-la Nainá. Tikoá jñò-nò ni'ya-la Nainá xi ngajen bíndaà-jen. ¹⁰Koni s'ín tjin kjondaà-la Nainá xi kitjoé-na, 'an-ná xi chjine chrjó ítjòn, xi tsibijnà tàts'en

chrjó-la ni'ya. Kje'í xitaá bíndaàsòn ni'ya. Tanga jñà xi bíndaàsòn, ndaà kàtasíkinda nga jngod ìjngod kós'ín kiindaà. ¹¹Mì tì yá xi koma-la kiijna ìjngod-isa tàts'en chrjó ni'ya koni jè xi jye tíjna, nga jè Jesucristo tíjna koni tàts'en chrjó ni'ya. ¹²Tàts'en chrjó ni'ya, komaá sindaàsòn-ne kichá oro, plata, ndajo chjí xi 'nó ndaà kjoàn, nas'ín yá, nas'ín xka paja, o xka ndiji. ¹³Tanga jñà xá xi s'ín nga jngod ìjngod xita, k'eé jcha-la jè nachrjein k'e nga sindaàjiin-la xita. Nachrjein jè, ni'ín kjoíiko, koa jè ni'ín skót'aà nga jngod ìjngod skaya xá xi komà. ¹⁴Tsà jngod xá kichikjoako-la ni'ín xi skót'aà, tjoé-la chjí-la jè xita xi kiindaàsòn. ¹⁵Tanga tsà jè xá xi kisindaàsòn, tsà kiti, chijaá chjí-la. Tanga jè xita kitjokàjiin kjo'in koni jngod xita xi bitjokàjiin ni'ín.

¹⁶Jñò, ¿a mìtsà tíjiin-nò nga ni'ya ingo tsjeè-la Nainá 'mì-nò? Nga jè Inima Tsjeè-la Nainá tíjnajiin-nò. ¹⁷Tsà yá xita xi mejèn-la sìikits'ón-jiin-la ni'ya tsjeè-la Nainá, Nainá tíkoaá sìikits'ón-jiin-la jè xita xi k'oas'ín s'íin. Nga jè ni'ya-la Nainá, tsjeè-né. Koa jñò-nò xi ni'ya tsjeè-la Nainá 'mì-nò.

¹⁸Kì yijo-nò chonachan-là, tsà yá xi k'oas'ín síkítsjeèn nga 'nó tíjn-la kjohítsjeèn xi ts'e kjoa chjine-la isò'nde, ta saá kos'ín kàtas'ín koni tsà tsjin-la kjohítsjeèn, mé-ne nga ngui xita chjine koma-ne. ¹⁹Jè kjoa chjine-la xita isò'nde, it'aà ts'e Nainá, kjoa ská tsò-la. Xojon-la Nainá, k'oaá s'ín tíchja nga tsò: “Nainá, k'oaá s'ín s'ín nga jñà xita chjine, tíjñà-ne kjoa maña-la kixojiin-ne.” ²⁰Jè Xojon-la Nainá, ìjngod k'a tíjt'aà ñánda tsò: “Nainá, beè-né nga nimé chjí-la kjohítsjeèn-la xita xi chjine tsò-la yijo-la.” ²¹K'oaá ma-ne, jñò, kì nijngod xita xi 'nga níkijna. Nga ngats'íi xi tíjn, kjondaà tsajòn yije-nò. ²²Tsà jè Pablo, tsà jè Apolos, tsà jè Cefas [xi tíkoa Pedro 'mì], tsà jè isò'nde, tsà jè kjoabinachon, tsà jè kjoa biyaà, tsà jè nachrjein i'nde, tsà jè nachrjein xi sa nchrobá, kjondaà tsajòn yije-nò. ²³Jñò, ts'e Cristo-nò, koa jè Cristo ts'eé Nainá.

Xá-la xita xi tsibíxáya-la Jesús

4 ¹K'oaá s'ín jchatakòn-nájen koni xita chi'nda xi síxá-la Cristo, nga ngajen kjongatsja-jen nga kokóya-jen kjoa tíj'ma-la Nainá. ²Jngod xita xi xá mangatsja, mochjeén-né nga kàta'ya-la nga kixi síkitasòn xá-la. ³An, mikiì síkájnoa xi it'aà tsajòn kó tsò kjohítsjeèn-nò, a ndaá tìsikitasoàn, a xi ch'oo

tisikitasoàn xá xi 'an kjòngatsja, kò kó s'ín síkítsjeèn jñà xitaxá xi bíndaajìin-là xita isò'nde. Skanda 'an, mì tì kii xan-na tsà ndaà tjín kò tsà ch'óó tjín xá xi tìs'iaàn. ⁴'An, nas'ín k'oas'ín síkítsjeèn nga tsjìn-na jé, tanga mìtsà tsò-ne kjoa nga ngui xita kixi-ná. Nga jè Na'è-ná xi bíndaajìin-na. ⁵K'oaá ma-ne kì tà chjà jé bìnè-là xinguiòo nga ti kj'eè bijchó nachrjein. Chíña-kjoaa k'e nga kjoíi Na'è-ná xi síhiseèn nga jcha-là kjoa xi jí'ma ñánda nga jñò choòn. Koa siikatsejèn kó tsò kjohítsjeèn xi tjíiin inima-là xita. Ikjoàn Nainá jeya siikíjna koni s'ín nga ok'in-là nga jngòò ìjngòò xita.

⁶Ndí 'ndsè kò tichjaá, koi 'én tichjako-nò kjoa xi mangásòn it'aà ts'an kò it'aà ts'e Apolos xi kjondaà tsajòn mé-ne nga mikii sikatonè-là koni tsò 'én-là Nainá. Kì k'oaá s'ín níkítsjeèn nga jngòò chí'nda-là Nainá isa ndaà nachrjenguiòò koni chí'nda xi i'nga. ⁷Jñò, ¿mé-ne koa bixón-nò nga isa 'ñó chjí-nò koni xita xi i'nga? ¿Mé kjondaà xi tjín-nò xi mìtsà Nainá kitsjaà-nò? Tsà jye kitjoé-nò ngats'iì kjondaà, ¿mé-ne nga 'nga ma-ne takòn koni tsà ta nga'ño tsajòn kisakò-nò?

⁸Jñò, k'oaá s'ín machiya-nò koni tsà jyeé ma yije-nò, koni tsà 'ño xita nchiná it'aà ts'e Nainá. K'oaá s'ín níkítsjeèn koni tsà xitaxá ítjòn titsajnaà kò ngajen mìtsà xitaxá titsajna-jen. Ndaà-là tjín tsà kixi kjoa nga otixoma, mé-ne ngajen koma kotixomako-nòjen. ⁹'An, k'oaá s'ín síkítsjeèn, ngajen xi it'aà ts'e Cristo kisixáya-najen, Nainá k'oaá s'ín kiskoòsòn-là nga ngajen-nájen xi fehet'aà-ne, xi tjínè-najen nga kiyá-jen nga nguixkon isò'nde, nga nguixkon xita kò àkjale. Jñà xita, tà nchikotsejèn-najen nga tsja ma-là mé kjo'in xi tímat'in-jen. ¹⁰Ngajen, xi kjoa ts'e Cristo, xita ská 'yatakòn-najen; tanga jñò, it'aà ts'e Cristo, k'oaá s'ín 'ya-nò nga 'ño tjín-nò kjoachjine. Ngajen, k'oaá s'ín 'yatakòn-najen nga xita indaàkjoa-nájen; tanga jñò, xita tájaà-nò. Ngajen, mì yá xita beèxkón-najen; jñò, beèxkón-nò xita. ¹¹Skanda jè hora jè, kjinchrá-najen, xínda-najen, tsjìn-najen nikje xi chíkjá-jen, 'ño beètoòn-najen xita, tà tjaàsòn-najen, tsjìn-najen ni'ya. ¹²Skanda bijtaá-najen nga 'ño nixá-jen. K'e nga chja'on-ko-nájen xita, ngajen, nijét'aà-lajen Nainá nga kàtasíchikon-t'in. K'e nga kondra fi-najen xita, chíkjoakoó-najen. ¹³'On chjako-najen xita, ngajen ndaà nokjoá-lajen. K'oas'ín beè takòn-najen koni tsà

tjé-la isò'nde. Skanda nàchrjein i'nde, jñà xit̃a k'oaá s'ín beètakòn-najen koni tsojmi xi ningui-ne nga bíxteèn.

¹⁴Koni s'ín tikjiì-nò, mìtsà tìs'iìn sobà-nò. Kjohítsjeèn tìtsja jngodò-nò koni tsà ixti ts'an xi matsjake. ¹⁵Nas'ín te jmiì ma-ne xi okóya-nò it'aà ts'e Cristo, ta jngodò ma-ne xi na'èn-nò. 'An-ná xi komà na'èn-nò nga mokjeín-nò it'aà ts'e Cristo Jesús nga 'aán tsibenojmí ítjòn-nò 'én ndaà-la Nainá xi kjoa ts'e Cristo. ¹⁶K'oaá ma-ne bìtsi'bà-nò nga k'oas'ín tjichá yijo-nò koni 'an.

¹⁷Koíi kjoa-la tìsikasén-nò Timoteo, xi ki'ndí-na xan-la nga 'ñó matsjake ko kixí síxá-la Na'èn-ná. Jè s̀ikítsjeèn-nò kós'ín tijnakoá Cristo Jesús nga mokjeín-na it'aà ts'e, koá kós'ín okoðya-la xit̃a naxandá-la Cristo nga kijndà naxandá ñanda bijchoa. ¹⁸Tjín i'nga xit̃a xinguiqo xi 'ñó 'nga chja, k'oaá-là s'ín síkítsjeèn tsà mìkiì kjíkon-nò. ¹⁹Tanga tsà Nainá mejèn-la, kjíkon nitoón-nò. K'e nga kijchoa, skoeè jñà xit̃a xi 'nga chja, a nga'ñó-la Nainá xi tjín-la a xi tà jè 'én-la xi 'nga chja. ²⁰K'e nga jè Nainá tíhotíxoma jngodò-la xit̃a, mìtsà ta kjoa ts'e 'én mochjeén, koó nga'ñó-la Nainá mochjeén. ²¹Jñò, ¿kós'ín mejèn-nò nga kjián? ¿A mejèn-nò nga kjo'in tsjaà-nò k'e nga kìjchokon-nò, a xi mejèn-nò nga ko kjondaà-na ko kjotsja-na kìjchokon-nò?

Jé xi kisakò ya ijiìn naxandá-la Cristo ján Corinto

5 ¹Jye na'ya-la nga kjoachijngui tíma ijiìn tsajòn. Kjoa xi tíma, skanda jñà xit̃a xi mìkiì beèxkón Nainá, mì k'oaá s'ín. Nga yaá tijnajiìn jngodò-nò xit̃a xinguiqo xi neajòn-la tsóhoko. ²Jñò, ¿mé-ne 'nga níkítsajna-nò yijo-nò? Mochjeén-né nga kjoaba kítsajnajñòd, ko jè xit̃a xi kotjín jé tíhótsji, tìnachrjekàjioòn. ³'An, kixíi kjoa, kjiìn tijnà-nò, tanga kjohítsjeèn-la inima-na yaá tijnajiìn osen-nò. 'An, k'oaá ngaya-la koni tsà ya tijnajiìn-nò, jyeé kiskoòsòn-la mé kjo'in xi sinè-la jè xit̃a xi k'oa tjin jé tíhótsji. ⁴Jñò, k'e nga koxkóya nga jeya síkíjna Jesucristo xi otíxoma-ná, jè kjohítsjeèn-la inima-na yaá kijnajiìn-nò, tikoá yaá kijnajiìn-nò jè nga'ñó-la Na'èn-ná Jesucristo. Ko it'aà ts'e Na'èn-ná Jesucristo, ⁵xit̃a jè, xit̃a neíi katangatsja yijo-la nga kátas'e-la kjo'in, ko kátasikájno jé-la nga mì tì jé kohótsji-ne mé-ne nga kitjokajiìn-ne kjo'in inima-la, k'e nga kjoíi ijngodò k'a Jesucristo xi otíxoma-ná.

⁶Mikiì ndaà tjin nga 'nga nikítsajna yijo-nò. ¿A mì tjiin-nò nga nas'ín ta chiba na'yo san sísan yije xíkjin na'yo?

⁷Tinachrjekàjioòn jè xita xi ótsji jé k'oaá ngaya-la koni tsà na'yo san xi mì tì ndaà-ne nga síkíts'ón-nò, mé-ne jñò k'oas'ín kjoàn koma-nò koni na'yo xitse ts'e inchrájin xi tsjin-la na'yo san. Nga jñò, jyeé kitjaàxìn-nò kjoa ts'e jé koni na'yo san jchínga nga jè Cristo k'en ngajo-ná koni jñà orrè xi kisik'en xita Israel k'e nga Paxko. ⁸Koif kjoa-la jñá, k'oaá s'ín kináchrjeé s'eí nga jyeé kisikítsajnandeíí-ná Nainá kjoa ts'e jé, koni s'ín xita Israel k'e nga Paxko nga sítsjeè ni'ya-la nga faáxìn yije na'yo san. Jñá, k'oaá tis'ín chjaàxián kjoa ts'e jé kjoa ch'o ko ngui kjoatsjeè ko kjoakixi síkjeén k'oaá ngaya-la koni inchrájin xi tsjin-la na'yo san.

⁹Jè xojon xi kisikasén ítjòn-nò, k'oaá kixan-nò nga mì ya koahijtakoo jñà xita xi kjoa chingui s'ín. ¹⁰K'e nga k'oa kixan-nò, mìtsà jñà kisikaxkia jñà xita isò'nde xi kjoa chingui s'ín, ko jñà xi tse mejèn-la, ko jñà xita chijé, ko jñà xi xkósòn beèxkón. Xita koi, xki xi ján satíkjoè. Ta jè xi koma kinchat'aàxìn-là tsà xìn isò'nde onguió. ¹¹Jñà 'én xi kixan-nò, jè-né nga mì ya tsjahijtakoo jñà xi tsò nga xita-la Cristo xi 'ndsè chibá tsà tákó kjoa chingui nchis'ín, xita xi tse mejèn-la, xi xkósòn beèxkón, xi ch'o chjajno-ná, xi xán 'biì, xi chijé s'ín. Jñà xita xi k'oas'ín s'ín, skanda mikiì mochjeén nga kichikoo. ¹²⁻¹³Mìtsà jñà oko-ná nga bíndaàjiin-lá jñà xita isò'nde. Jè Nainá kiindaàjiin-la jñà xita koi. Tanga jñò oko-nò nga kíndaàjiin-là xita naxandá-la Nainá xi tsajòn. K'oaá ma-ne nga xan-nò, chjaàxiòn jè xita xi ch'o tís'ín xi ya tijnajiin-nò.

Kós'ín s'iin jñà xita-la Cristo nga tijná xíkjin koindaàjiin-la

6 ¹Jñò, k'e nga tsà kjoasì tjin-nò ko xita xinguioo, ¿mé-ne jñà mejèn-nò koindaàjiin-nò jñà xitaxá xi mìtsà xita-la Cristo? ¿A mìtsà tà jñà kátindaàjiin-nò xi xita naxandá-la Cristo? ²¿A mìtsà tjiin-nò nga jñá xi xita naxandá-la Cristo 'mì-ná, jñá kíndaàjiin-lá xita isò'nde? Tsà jñò koindaàjiin-là xita isò'nde, ¿a mì chíkjoa-nò nga ta jñò kíndaàjiin-là xita xinguioo kjoa xi chiba tjin? ³¿A mìtsà tjiin-nò nga tikoá it'aà tsaján kíndaàjiin-lá àkjale? Tsà jñá kíndaàjiin-lá àkjale, ¿a mì koma-ná kíndaàjiin-lá xita xinguiá kjoa xi tjin i isò'nde? ⁴K'oaá ma-ne tsà ta kjoa ts'e isò'nde-né xi tjin-nò,

tínókjoa jngodè-là xit̃a 'ndsè xi jñò nachrjenguioð nga 'mì-là nímé chjí-la, jè kátindaàjiin-nò. ⁵Koií koa xan-nò mé-ne nga kátasobà-nò. ¿A mìtsà tíjna jngodè xit̃a xinguiòo xi t́jín-la kjohítsjeèn nga koma-la koíindaàjiin-la xit̃a xi 'ndsé chibá? ⁶Mìtsà ta koií kjoa-la nga bixkàn-koo xinguiòo, skanda yaá onguíkoo xinguiòo nguixkon xit̃axá xi mìkiì beèxkon Nainá nga bindaàjiin-nò.

⁷Kixíí kjoa, ch'oó t́jín kjoa k'e nga t́jñò bixkàn-ko-nò xinguiòo. ¿Mé-ne mìtsà ta saá nìkjeiín-là xinguiòo k'e nga ch'o síko-nò? Ta saá t́kjeiín-la nga kátasíchijé-nò. ⁸Tanga jñò, k'oaá tís'ín ch'o nìkoo xinguiòo, t́jñò nìchijé-là.

⁹¿A mìtsà t́jiin-nò nga jñà xi mìtsà xit̃a kixi, mìkiì kjoahas'en-jiin i'nde ñánda tíhotíxoma Nainá? Jñà xit̃a xi kjoa chijngui s'ín, jñà xi xkósòn beèxkón, jñà xit̃a xi jye chixàn xi kjoa chijngui s'ín, jñà xit̃a xi'ndè xi t́i x'in xíkjín oyijòko-ne, ¹⁰jñà xit̃a chijé, jñà xit̃a tse mejèn, jñà xit̃a xi xán 'biì, jñà xi xit̃a chjajno-la, jñà xit̃a xi konachan-la xíkjín nga síchijé-la, kì yijo-nò chonachan-là nga jñà xit̃a xi koatjín kjoach'o xi s'ín mìkiì kjoahas'en-jiin ñánda tíhotíxoma Nainá. ¹¹Jñò, k'e nga sa kjòtseé k'oa tís'ín ki'nè i'nga; tanga i'ndeí, jye kisaníjno kjoa ts'e jé-nò, jye xit̃a tsjeè-la Nainá komà, ko jye xit̃a kixi komà it'aà ts'e nga'ño-la Jesucristo xi otíxoma-ná ko it'aà ts'e Iníma Tsjeè-la Nainá.

Kó s'ín síchjeén yijo-ná mé-ne nga jeya kíjna Nainá

¹²T́jín i'nga xit̃a xinguiòo xi tsò: “¹An t́jí'ndeé-na nít̃a mé kjoa xi s'iaàn.” Kixíí kjoa t́jí'nde-né, tanga mìkiì ok'in-la tsà k'oas'en yijeé ngats'iì kjoa; k'oaá ma-ne, 'an, mìkiì tsjaà'nde-la yijo-na nga síkijne-na jngodè kjoa. ¹³Tíkooá t́jín i'nga xi tsò: “Jñà tsojmì xi ma chine, ts'eé indso'ba, koa jè indso'ba mochjeén-la tsojmì xi ma chine.” Kixíí kjoa, tanga ingajò kjoa koi, Nainá síkjet'ha. Tanga jè yijo-ná, mìtsà kos'ín kochjeén nga kjoa chijngui s'eén; it'aà ts'e Nainá kochjeén; yijo-ná, ts'eé Nainá. ¹⁴Koni s'ín kis'iin Nainá nga kisíkjaáya-la Na'èn-ná Jesús, jñà k'oaá tís'ín kjoaáya-ná it'aà ts'e kjoa biyaà nga t́jín-la nga'ño Nainá.

¹⁵¿A mìtsà t́jiin-nò nga jè yijo-ná, yaá t́kjodko ts'e Cristo? ¿A komaá síkjeén yijo-la Cristo nga síjngod't'aà-lá ts'e chjoón ská? Majín, mìkiì koma. ¹⁶¿A mìtsà 'yaà, k'e nga jngodè xit̃a

x'in, tsà chjoón ská kijnako, jngoð yijoó koma? Nga k'oaá s'in tíchja Xojon-la Nainá nga tsò: Ingajò xita koi, jngoð yijoó koma. ¹⁷Tanga jè xi Na'en-ná tijnako, yaá majngoðko inima-la kò ts'e Na'en-ná.

¹⁸Tinchat'aàxin-là kjoa chijngui. Jngoð xita, nita mé jé xi ótsji xi kjeif jé, mìtsà yijo-la tibeetoon. Tanga jè xita xi kjoa chijngui s'in, yijo-laá beetoon. ¹⁹¿A mìtsà tíjiin-nò nga jè yijo-nò ni'ya-la Inima Tsjeè-la Nainá-né xi jñò kitsjaà-nò Nainá nga tijnajiin inima-nò? Yijo-nò, mìtsà tí tsajòn-nò. ²⁰Nainá jye tsakatse-nò, tsee tsibíhjtjì-nò. Koií kjoa-la jchaxkón Nainá, ndaà tikjeén yijo-nò nga ts'eé Nainá.

Kjoa ts'e xita xi bixan

7 ¹It'aà ts'e 'én xi kichjinangui-ná nga kinikasén-ná xojon nga bixón: “Ndaa-la tjin, jngoð xita x'in kò jè chjoón tsà mìkiì kixan.” ²Tanga koií kjoa-la nga 'ñó tjin kjoa chijngui, nga jngoð ìjngoð xita x'in kàtas'e-la chjoón, kò nga jngoð ìjngoð chjoón kàtas'e-la x'in. ³Koni s'in tjin kjotixoma ts'e kjoa bixan, jè x'in, ndaà kàtasís'in-la chjoón-la k'e nga kójnako, tíkoa jè chjoón, ndaà kàtasís'in-la x'in-la. ⁴Jè chjoón, mìtsà tíjè otixoma-la yijo-la, jè x'in-la otixoma-la. Tíkoa jè x'in mìtsà tíjè otixoma-la yijo-la, jè chjoón-la otixoma-la. ⁵K'e nga tsjáyijòkoo xinguiò, kì yijo-nò nìxkon-là xinguiò. Tà k'e-né tsà ngàsòn chibàya-nò kótjin nachrjein mìkiì tsjáyijòkoo xinguiò tsà Nainá kinókjoat'aà-là. Xi koma iskan mochjeén-né nga sis'in-là xinguiò nga mì jè xita neif skónachan-nò k'e nga tsà mì tí kiì chikjoa-nò nga xìn tsjáyijò-là xinguiò.

⁶'En xi tixan-nò tà 'an-ná xi titsjaà'nde-nò; mìtsà kjotixoma tibìnè-nò. ⁷Xi it'aà ts'an, mejèn-na tsà ngats'iì xita k'oas'in kàtitsajna tajngoð, koni 'an, tajngoó tijnna. Tanga ìjngoð ìjngoð xita kits'iì-la kjotjò xi Nainá kitsjaà-la, kós'in kítsajna. Kàkj'eif kàkj'eif s'in títsajna nga ìjngoð ìjngoð xita.

⁸Jñà xita xi títsajna tajngoð kò jñà íchjín xi jye k'en x'in-la, ndaà-la tjin tsà tà k'oas'in kítsajna tajngoð koni 'an. ⁹Tanga tsà mìkiì chikjoa-la nga bitsajna ìjngó, isaa ndaà-ne tsà kàtixan, mì k'oa-ne tsà tsjè sijk'en.

¹⁰'An, k'oaá s'in binè-la jñà xita xi jye chixàn, nga mìkiì koma tsjeín xikjín. Jè chjoón, mìkiì koma sijkjina x'in-la. Mìtsà kjotixoma ts'an xi tsjaà-nò; ts'eé Nainá. ¹¹Jè chjoón xi

tsjeiin x'in-la, mìkiì tjí'nde-la nga kj'eíí x'in kixan-ko ìjngod k'a. Tíkooá-ne kàtajoóndaà-ne. Tíkooa jè x'in, mìkiì tjí'nde-la nga tsjeín chjoón-la.

¹² Jñà xita xi i'nga, k'oaá xan-la, xi tà kjohítsjeèn ts'an, mìtsà jè Na'èn-ná tsibíjna kjotíxoma jè. Tsà jngod xita x'in xi mokjeín-la 'én-la Nainá, tsà jè chjoón-la xi tíjnako, tsà mìkiì mokjeín-la, tsà tsò ikon jè chjoón nga bíjnako, kàtijnako, kì tsjeiin takòn jè chjoón-la. ¹³ Tsà jngod chjoón xi mokjeín-la 'én-la Nainá, jè x'in xi tíjnako, tsà mìkiì mokjeín-la, tsà tsò ikon jè x'in nga bíjnako, kàtijnako, kì tsjeiin takòn jè x'in-la. ¹⁴ Jè x'in xi mìkiì mokjeín-la 'én-la Nainá, it'aà ts'e chjoón-laá matsjeè-né; tíkooá jè chjoón xi mìkiì mokjeín-la, it'aà ts'e x'in-laá matsjeè-né. Tsà majìn, jñà ixti-la mìtsà xita kixi nga nguixkon Nainá, tanga i'ndeí ixti-la, yaá chja-ne naxandá-la Cristo. ¹⁵ Tanga tsà jè chjoón xi mìkiì mokjeín-la 'én-la Nainá tsà mejèn-la tsjeín x'in-la xi mokjeín-la, kàtatsjeiin. Ko tsà jè xita x'in xi mìkiì mokjeín-la 'én-la Nainá, tsà mejèn-la nga tsjeín chjoón-la xi mokjeín-la, kàtatsjeiin. Jñà xita koi mìkiì tíjnè-la nga kjo'ñó kítsajna xoíjín. Nainá, jè xi mejèn-la nga 'nchán kítsajna. ¹⁶ Ji chjoón xi mokjeín-lè it'aà ts'e Cristo, mìkiì tíjiin-lè tsà koi nachrjein it'aà tsiji koma kitjokàjiin kjo'in x'in-lè. Ko ji xi x'in 'mì-lè nga mokjeín-lè it'aà ts'e Cristo, mìkiì tíjiin-lè tsà koi nachrjein it'aà tsiji koma kitjokàjiin kjo'in chjoón-lè.

¹⁷ Jngod kjoa mejèn-na nga ndaà síkíjna-la ngats'ii xita naxandá-la Cristo, nga ìjngod ìjngod xita x'in ko chjoón, mochjeén-né nga kos'ín kàtasíjchá yijo-la koni s'ín kitsjaà-la Nainá koni s'ín títsajna k'e nga Nainá kiichja-la nga xita-la komà. ¹⁸ Tsà tíjn i'nga xita xi jye tít'aà chiba yijo-la kjoa ts'e circuncisión k'e nga xita-la Cristo komà, tà k'oaá s'ín kàtijná. Tsà tíjn i'nga xi kj'eè kiì tít'aà chiba yijo-la, kì bí't'aà chiba-la yijo-la. ¹⁹ Xi kjoa ts'e circuncisión, tsà tít'aà chiba-nò ko tsà majìn, mìtsà mé-ne. Jè xi chíj-la nga ndaà síkitasòn jè kjotíxoma-la Nainá. ²⁰ Nga jngod ìjngod, k'oaá s'ín títsajna koni s'ín titsajnaà k'e nga kiichja-nò Nainá. ²¹ K'e nga kiichja-lè Nainá, tsà chi'nda tíjni, kì makájno-lè. Tanga i'ndeí tsà koma kijnandeí-ne, ndaà s'e, tíjnandeí-ne. ²² Jè xi chi'nda tí'sín k'e nga kiichja-la Nainá nga kòkjeín-la 'én-la, i'ndeí tíjnandeí-né it'aà ts'e Cristo. K'oaá tis'ín tíjn, jè xi tíjnandeí k'e nga

kiichja-là Nainá, i'ndeí chi'nda-là Cristo-né. ²³Jñò, Nainá jye tsatse-nò, kì kii biì'nde nga xita xi k'jeíí chi'nda 'nè-là. ²⁴Jñò ndí 'ndsè kò tichjaá, koni s'ín titsajnaà nga jngodò ijngodò k'e nga kiichja-nò Nainá, k'oaá s'ín titsajna ya nguixkon Nainá.

²⁵It'aà ts'e xita xi titsajna tajngodò, tsjin jngodò-na kjotixoma xi ts'e Na'èn-ná. 'An, k'oaá s'ín kosòn-là koni tsò kjohítsjeèn-na nga Nainá kis'e-là kjohimatakòn mé-ne nga it'aà ts'an kjoaà'taà takòn-na jñà xita. ²⁶Koií kjoa-là nga 'ñó 'in choòn nachrjein i'ndeí, 'an, k'oaá s'ín sikítsjeèn, isaá-la ndaà tjín, tà k'oas'ín kàtitsajna xita koni s'ín titsajna skanda nachrjein i'ndeí. ²⁷Tsà tjín-lè chjoón, kì nikíjna-jèn chjoón-lè. Tsà tsjin-lè, kì chjoón binchaàtsji. ²⁸Tsà kixein, mitsà jé tibinchaàtsji. Kò tsà jngodò chjoón xongó xi kixan, tikoáá mitsà jé tíhótsji. Ta jè-né, k'e nga jye kixan, kjoaá s'e-nò. 'An, mejèn-na nga mì kjoa kàtas'e-nò.

²⁹Ndí 'ndsè, mejèn-na nga kàtasijjìn-nò, nga chiba jchán nachrjein chija nga ma sixá-lá Nainá. Koií kjoa-là jngodò xita x'in xi tjín-là chjoón, k'oaá s'ín kàtas'ín koni tsà tsjin-là chjoón. ³⁰Kò jñà xita xi kjoaba titsajnajjìn, k'oaá s'ín kàtitsajna koni tsà mì ba titsajna. Koá jñà xi s'eí tjín-là, k'oaá s'ín kàtitsajna koni tsà mì s'eí tjín-là. Koá jñà xi tsojmì otse, k'oaá s'ín kàtas'ín koni tsà nímé tjín-là. ³¹Kò jñà xi fitjingui-là kjoa xi tjín isò'nde, k'oaá s'ín kàtas'ín koni tsà mì ya fitjingui-là; nga jè isò'nde xi titsajnasoán ijndé, kjoehet'aà-né.

³²'An, k'oaá s'ín mejèn-na nga nímé kjoa ts'e isò'nde sikítsjeèn. Jè xita x'in xi tjina tajngodò, koií síkítsjeèn kjoa ts'e Nainá, mé xi s'jin nga kotsja-là Nainá. ³³Tanga jè xi jye chjoón tjín-là, koií síkítsjeèn kjoa xi tjín isò'nde mé xi s'jin nga kotsja-là chjoón-là, ³⁴k'oaá ma-ne nga jò kjoa síkítsjeèn. Tikoáá jè chjoón ka'àn xi jye k'en x'in-là kò jè chjoón xi tjina tajngodò xi k'je'e x'in tjín-là, koií síkítsjeèn kjoa ts'e Nainá mé-ne nga tsjeè síkítsajna-ne yijo-là kò inima-là. Tanga jè chjoón xi x'in tjín-là, koií síkítsjeèn kjoa ts'e isò'nde mé xi s'jin nga kotsja-là x'in-là.

³⁵Kjoa xi benojmí-nò kjondaà tsajòn-nò, mìtsà xan-nò nga 'an ósijna ikon-nò, jè-né nga nguì ndaà sijchá yijo-nò nga nímé kjoa kiichjoà ikon-nò nga sixá-là Nainá.

³⁶Tsà jngodò x'in xi kos'ín tísíkítsjeèn nga mì ndaà tísíko chjoón nga mì xatí tibixan-kò nga jye tíhóto nó-là chjoón,

k'oaá s'ín kàtas'ín koni s'ín síkítsjeèn, kàtixan; jè kjoa bixan, mìtsà jé nchihótsji. ³⁷Tanga tsà jngoò xi k'oa's'ín bìnè-la yijo-la kò inìma-la nga majìn-la kixan, nga kjohítsjeèn ts'e-né, kò tsà chíkjoa-la yijo-la nga mìkiì kixan, kò tsà jye kos'ín kiskoodsòn-la, ndaà tjin. ³⁸Jná xita xi bixan, ndaà s'ín, tanga jná xi mìkiì bixan, isaá ndaà s'ín.

³⁹Jngoò chjoón xi x'in tjin-la, mìtsà tijnandeí. K'ée-né tsà jye k'en x'in-la nga jye tijnandeí. Koma kixan-kò nita yá x'in-ne xi matsjakeè tsà tanga mokjeíin-la 'én-la Nainá. ⁴⁰An, k'oaá s'ín síkítsjeèn, ndaà-la tjin tsà mì tì kiì kixan-ne jná íchjín ka'an. Tikoaá 'an, k'oaá s'ín machiya-na nga jè Inìma Tsjeè-la Nainá tísíchiya-na.

Tsojmì xi sinchásòn ya nguixkòn xkósòn

8 ¹Jè kjoa xi ts'e yijo-la cho xi sík'en-la xkósòn-la xita isò'nde nga tsjá-la kjotjò, jñò bixón-nò nga ngats'iaá jyeé tjin-ná kjoachjine it'aà ts'e kjoa koi. Kixí kjoa, tanga k'e nga tjin-ná kjoachjine, ma'ngaá takoán. Tanga k'e nga tjin-ná jè kjotsjacha, isaá ndaà 'biì-lá nga'ño xinguaá. ²Tsà tjin i'nga xita xi tsò nga ndaà machiya-la, chijaá isa-la; kj'eè kiì beè yije koni s'ín tjinè-la nga skoe. ³Jngoò xita xi matsjakeè Nainá, jè Nainá ndaà beèkxon.

⁴K'oaá xan-nò kó s'ín tjin, tsà ma chine yijo-la cho xi ya biyaat'aà-la jná xkósòn. Tíjìin-ná nga jná xkósòn xi tjin i isò'nde, nímé nga'ño tjin-la. Nga ta jngoò ma-ne xi Nainá. ⁵Jná xita, k'oaá s'ín síkítsjeèn nga kjìn ma nainá xi tjin ján ngajmì kò it'aà nangui. (Kixí kjoa it'aà ts'e xita koi, kjìn ma xi nainá kò na'èn-ná tsò-la.) ⁶Tanga jná, 'ya-ná nga ta jngoò ma-ne Nainá xi Na'èn-ná nga it'aà ts'eé inchrobà-ne nita mé xi tjin. Jná, koií xá tjin-ná nga sikitasoán xá-la. Tikoaá ta jngoò ma-ne xi otíxoma-ná, jè Jesucristo; nga it'aà ts'eé nga'ño-la kisindaà yije nita mé xi tjin kò tikoaá jná, it'aà ts'eé titsajnakoaán.


⁷Tanga mìtsà ngats'iì xita tíjìin-la kjoa koi. Tjin i'nga xita 'ndseé xi jye k'oa's'ín kjò'nga-la kjoa ts'e xkósòn k'e nga tikj'eè mokjeíin-la. Tanga i'ndeí, k'e nga kine yijo-la cho xi ya biyaat'aà-la jná xkósòn, k'oaá s'ín síkítsjeèn nga jná nchibeèkxón xkósòn xi nainá tsò-la xita isò'nde. Nga jò tjin kjohítsjeèn-la, k'oaá s'ín fiya-la nga jé ótsji nguixkòn Nainá. ⁸Jñò bixón-nó nga jná tsojmì xi ma chine, mìtsà koi kjoa-la

nga isa ndaà skoétjò-ná Nainá. Tsà kichiaá mìtsà isa ndaà kitsajnaá kò tsà mìkiì kichiaá mìtsà isa ch'o kitsajnaá nga nguixkon Nainá. ⁹Kixí kjoa, tjí'nde-ná nita mé xi chjineé. Tanga jná jchósòn-lá yijo-ná nga mì k'oaá tjin xi chjineé mé-ne jná xita 'ndseé xi indaàjiin tjin kjohítsjeèn-la mì jé sakò-la. ¹⁰Tsà tjin jngoò xita xinguioo xi tsò nga tjin-la kjohítsjeèn nga ma chine nita mé yijo-ne, kò yaá fi kakjèn ya i'nde nanda yaxkón xkósòn; tsà koi nachrjein-la ya skoe jngoò 'ndsé xi indaàjiin tjin kjohítsjeèn-la nga ya tíkjèn. Jè xita 'ndsé, k'oaá tis'in s'iin. ¹¹Kjohítsjeèn-la xita jè nga tsò nga maá chine yije nita mé-ne, koií kjoa-la nga kjo'in sijkjeín jè 'ndsé xi indaàjiin tjin kjohítsjeèn-la xi Cristo k'en ngajo-la. ¹²K'e nga jé binchaàtsjioò xi kondra ts'e xita 'ndseé nga nikits'ón-jnòò kjohítsjeèn-la xi indaàjiin tjin, jé binchaàtsjioò xi kondra ts'e Cristo. ¹³'An, tsà ta koií kjoa-la ts'e tsojmì xi kínee nga jé sakò-la jè 'ndsé, tikoaá-ne, jngoò k'a mì ti kiì skíne-na yijo, mé-ne nga mì jé sakó-la 'ndsé.

Kjoa xi tjí'nde-la xita xi tsibíxáya-la Cristo

9 ¹'Aán tsibíxáya-na Cristo. Tijnandeíj-ná. Xkoaàn kijtseè-na jè Jesús xi otíxoma-ná. Nga xá-la Na'èn-ná tis'iaàn, i'ndeí jnò-nò xi xita-la Cristo maà. ²K'oaá xó tsò i'nga xita xi kje'eií nga mì xó tsà 'an tsibíxáya-na Cristo, tanga jnò, ndaà tíjiin-nò nga 'aán kisixáya-na, nga it'aà ts'an-ná nga mokjeíin-nò 'én-la Nainá. K'oaá s'in bitjo kixi kjoa.

³K'e nga jngoò xita kjònangui-na xi kondra ts'an, 'an, kíí xan-la nga ósikoaa yijo-na: ⁴¿A mìtsà tjí'nde-najen nga k'oi-najen tsojmì xi chine-jen kò xi s'io-jen nga xá-la Nainá tita'nè-jen? ⁵¿A mìtsà tjí'nde-najen nga kitjako jngoò-jen xi chjoón-najen ma xi 'én-la Nainá mokjeíin-la, koni s'in xita xi i'nga xi tsibíxáya-la Cristo koni jná 'ndse Na'èn-ná kò Cefas [xi tikoa Pedro 'mì]? ⁶¿A tà 'an-ná kò Bernabé xi tjinè-najen nga kje'eií xá s'en-jen mé-ne nga sakò-najen tsojmì xi chine-jen? ⁷¿A tjin xita xi soldado síkitasòn xi tjié bíchjí-la yijo-la? ¿A tjin xita xi bitje tsojmì tje, koa mìkiì kine toò xi ojà-la? ¿A tjin xita xi cho síjchá, koa mìkiì 'biì tsjin xi ochrje? ⁸Kì k'oaá s'in nikítsjeèn nga tà kjohítsjeèn ts'an koni s'in tixan. Tikoaá tíchjaá kjotíxoma ts'e Moisés. ⁹Kjotíxoma-la Nainá xi kiskii Moisés, k'oaá s'in tíchja nga tsò: “Jná nchraja xi bínchi, kì



na'ya bi'a tso'ba." 'Én koi mitsà tsò-ne kjoa nga Nainá 'ñó síkinda nchraja, ¹⁰jñá-ná xi síkinda-ná Nainá; nga it'aà tsaján tíchja kjo'tíxoma. Jè xi síkínchi nchraja ko xi sítsjeè tsojmì xi majchá-la, nchikoñaá-la nga tjoé chiba-la tsojmì xi majchá-la. ¹¹'Én ndaà-la Nainá xi kjoa ts'e Cristo xi jin tsakoóya-nòjen jè ngaya-la koni tachó xi kisítje ijìin inima-nò. ¿A mì ndaà s'e tsà tjoé chiba-najen tsojmì xi majchá-nò? ¹²Tsà jñà xi kj'eíí xita tjoé chiba-la tsojmì xi tsajòn, ngajen, ¿a mitsà isa ndaà tjí'nde-najen nga tikoá tjoé-najen?

Tanga mì k'oaá s'ín titsa'nè-jen koni s'ín tjí'nde-najen mé-ne nga mìkiì koma sichjoà ikon-la 'én ndaà-la Nainá xi kjoa ts'e Cristo. ¹³Jñò, ndaà 'yaà, jñà xita xi ya síxá ya Ingo Ítjòn-la Nainá, koi tsojmì kine xi tjín ya i'nde jè; ko jñà xi ya síxá i'nde tsjeè-la Nainá ya nánnda binchásòn kjo'tjò xi tsjá-la Nainá jñà xita, okoó chiba-la yijo-la cho xi ya binchásòn. ¹⁴Nainá k'oaá s'ín kitsjaà okixi: jñà xi chjaya 'én ndaà-la Nainá xi kjoa ts'e Cristo yaá sakò-la tsojmì xi skine. ¹⁵'An, mì k'oaá s'ín tìsikjeén jñà kjoa xi tjí'nde-na. Tikoáá mitsà koi xá tikjiì-nò nga kos'ín síko-ná. Isáá-la ndaà tjín tsà kàtiyaà mì k'oaá-ne tsà tjín xita xi kjoááxin-na kjotsja xi tjín-na nga ta kjo'tjò 'an chjaya 'én ndaà-la Nainá xi kjoa ts'e Cristo.

¹⁶Nga 'én ndaà-la Nainá xi kjoa ts'e Cristo chjaya, mìkiì tsà jeya síkijna yijo-na. 'An, xó k'oaá s'ín tjínè-na nga 'an kichjaya; ima xó-na tsà mìkiì kichjaya jè 'én ndaà-la Nainá xi kjoa ts'e Cristo. ¹⁷Tsà tà kjohítsjeèn ts'aán-là nga kos'ín tìs'iaàn, tjínè-la nga kojhí-na, tanga mitsà tà kjohítsjeèn ts'an, jè tìsikitasoàn xá xi kisingatsja-na Nainá. ¹⁸Jè chjí xi tísakó-na, jè-né nga tsja

tjín-na nga chjàya 'én ndaà-la Nainá xi kjoa ts'e Cristo nga mìtsà chjí-na s'jé, nas'ín tjí'nde-na nga jè 'én ndaà-la Nainá xi kjoa ts'e Cristo kótijnakon-na.

¹⁹ An tijnandeí-ná, tanga i'ndeí, k'oaá s'iaàn koni tsà ch'i'nda-la ma ngats'iì xita, mé-ne nga isa kjìn xita koma kichjà-la 'én-la Cristo nga kokjeíin-la. ²⁰ K'e nga ya tijnajiin-la jñà xita xinguiáa judío, k'oaá s'ín s'iaàn koni s'ín xita judío mé-ne nga koma kichjà-la 'én-la Cristo nga kokjeíin-la. Kixí kjoa nga 'an, mikii kjo'ño tjínè-na nga kos'ín sikitasoàn koni tsò kjotíxoma xi kiskii Moisés, tanga k'e nga ya tijnajiin-la jñà xita judío xi kjotíxoma-la Moisés títsajnajiiin, 'an k'oaá ti s'iaàn, ta jè xi mejèn-na nga koma kichjà-la 'én ndaà-la Nainá xi kjoa ts'e Cristo nga kokjeíin-la. ²¹ K'e nga ya tijnajiin-la jñà xita xi mìtsà ya títsajnajiiin kjotíxoma-la Moisés, 'an, k'oaá ti s'iaàn koni tsà mì ya tijnajñaà kjotíxoma mé-ne nga koma kichjà-la 'én-la Cristo nga kokjeíin-la xita xi mì ya títsajnajiiin kjotíxoma. Mìtsà tsò-ne kjoa nga tijnat'aà xìn-la kjotíxoma-la Nainá. Yaá tijnajñaà kjotíxoma-la Cristo. ²² K'e nga ya tijnajiin-la jñà xita xi indaàjiin tjín kjohítsjeèn-la, 'an, k'oaá s'iaàn koni tsà tikoáá indaàjiin tjín kjohítsjeèn-na mé-ne nga koma kichjà-la 'én-la Cristo xita koi. Yaá singásòn yijekoáa mé kjoa xi títsajnajiiin ngats'iì xita mé-ne nga koma kochrjekàjiin i'nga-na kjo'in kjoa ts'e jé-la. ²³ K'oaá s'iaàn xi kjondaà ts'e 'én ndaà-la Nainá xi kjoa ts'e Cristo mé-ne nga s'e-na kjoa machikon-t'in it'aà ts'e 'én.

²⁴ Jñò, jyeé tjiiin-nò k'e nga síská xita xi ongachikon, ngats'iì-né nga ongachikon, tanga ta jngod-né xi tjoé-la kjotjò, ta jè xi síkijne. Jñò, k'oaá s'ín tijchá yijo-nò nga xita-la Cristo 'mì-nò koni jngod xita xi ongachikon mé-ne nga tjoé-nò kjotjò xi Nainá tsjá-nò. ²⁵ Jñà xita xi sískákjod nga mejèn-la sìkijne, ítjòn bitsajnandaà nga mì tijña sìkjeén-ne tsojmì xi ch'o síko; koi k'oas'ín-ne nga mejèn-la tjoé jngod-la kjotjò. K'e nga jye ma iskan, jè kjotjò xi tjoé-la, ta bits'on-né. Tanga jñà bitsajnandaá nga tjoé jngod-ná kjotjò xi mikii bits'on nita kjé-ne. ²⁶ An, mìtsà k'oas'ín ongachikoan [kjoa ts'e xá-la Nainá] koni jngod xita xi mikii beè nanda kijchò. Tikoáá mìtsà k'oas'ín [s'ixá it'aà ts'e Nainá] koni s'ín xita xi ta 'beéjiin isén k'e nga kjaán-ko xíkjin. ²⁷ An, k'oaá s'ín bìnè-la yijo-na nga kátas'e-na kjo'in

mé-ne k'e nga kjoehet'aà nachrjein nga okòdya-la xita 'én ndaà-la Nainá xi kjoa ts'e Cristo, Nainá mì kitso-na: “Nì mé chjí-la xá-lè.”

Kjoa ts'e xkòsòn xi mìtsà kixi kjoa nga Nainá

10 ¹Jñò ndí 'ndsè kò tichjaá, kì nìchàajìin-jèn nga jñà xita jchínga kjiin-ná, [k'e nga itjojiin naxandá Egipto], yaá tsibítsajngui yije jjiin ifi [nga tsakó-la ndiyá], tìkooá ngats'iì tsatojiin ndáchikon. ²K'ooá ngaya-la koni tsà komà bautizar ya jjiin ifi kò jjiin ndáchikon mé-ne nga xita-la Moisés koma-ne. ³K'ooá tìs'ín jngòò skaya tsojmì kiskine xi kjojkón ndaà ts'e Nainá. ⁴Tìkooá ta jngòò skaya nandá kits'iì xi kjojkón ndaà ts'e Nainá, jè nandá xi ya naxi itjo-ne nga jè Nainá kitsjaà-la. Jè naxi, jè ngaya-la Cristo nga jè tsajmeèyakò ndiyá ñánda chinchimaya. ⁵Tanga jñà xita jchínga koi, kjiin jchán k'en ya ñánda nangui kixi choòn nga Nainá mìkiì kisaseèn-takòn koni s'ín kis'iin ngats'iì xita jchínga koi, ta chibaá tsiningui-ne.

⁶Jñà kjoa xi k'oas'ín komà, jñà okóya-ná nga mì jñà sijkajñáa kjoa xi ch'o tjín koni kis'iin jñà xita jchínga-ná. ⁷Kì k'oa s'ín sando xkòsòn yaxkón koni kis'iin i'nga xita jchínga koi, nga k'ooá s'ín tichja Xojon-la Nainá nga tsò: “Jñà xita naxandá tsibítsajna nga tsakjèn koa kits'iì, ikjoàn tsasítjen nga kitè [nga jè kisítsjako xkòsòn].” ⁸Tìkooá mìkiì kjoa chijngui s'eén koni s'ín kis'iin i'nga xita jchínga koi, nga tà jngòò nachrjein kaàn jàn jmiì xita k'en. ⁹Mì kì taxkì chít'aá Na'èn-ná koni s'ín kis'iin i'nga xita jchínga koi; k'ooá komà-ne nga k'en nga kiskine-la ye. ¹⁰Tìkooá kì í'ño-isa tsajét'aà-là Nainá koni s'ín kis'iin i'nga xita jchínga koi. K'ooá komà-ne nga jè àkjale-la kjoabiyaá kisik'en xita koi.

¹¹Ngats'iì kjoa koi, k'ooá s'ín komàt'in jñà xita jchínga-ná kò k'ooá s'ín kisijna chiba mé-ne sijiin-ná. Kisit'aá Xojon-la Nainá nga jchaá jñá mé kjo'in xi sinè-ná tsà k'oa tìs'ín s'eén jñá xi titsajnakooán nachrjein xi jye tífehèt'aà. ¹²K'ooá ma-ne jè xi kos'ín síkítsjeèn nga kixi tjina, kàtasíkinda yijo-la nga mì jé sakó-la. ¹³Jñò, kj'eè mé kjoa xi mat'ioòn nga tíchít'aà-nò xi isa 'ño 'in tjín koni mat'in xita xi kj'eíí. Nainá, xita kixi-né, jè kàta'ñót'aà takòn nga mìkiì tsjá'nde nga isa tsato chít'aà-nò koni kji chíkjoako-nò. Tijè-ne Nainá kòkò ndiyá kós'ín

kichikjoa-nò koni s'ín tíchìt'aà-nò skanda k'e nga kjoehet'aà kjoa.

¹⁴Jñò ndí 'ndsè, nì ìtsé kjoa ts'e xkòsòn níkítsjeèn nga mejèn-nò jchaxkón. ¹⁵'An, k'oaá s'ín tíchjà-nò koni xita xi tjín-la kjohítsjeèn. Jchòsòn-là 'én xi xán-nò, a kixíj kjoa. ¹⁶K'e nga 'yoaá vino xi tjíya chítsín nga nìjèt'aà-lá Nainá nga kàtasíchikon-t'in, ¿a mìtsà ya ñingàsòn-koaá kò jní-la Cristo? Kò k'e nga nìxkoayaá inchrajín, ¿a mìtsà ya ñingàsòn-koaá kò yijo-la Cristo? ¹⁷Jñá, nas'ín 'nó kjìn ma-ná, jè inchrajín xi bichiaá, ta jngodè ma-ne; k'oaá ma-ne nga ngats'iaá, ta jngodè yijo ma-ná.

¹⁸Chítsejèn-là xita naxandá Israel, jñà xi kine yijo-la cho xi biyaá ya i'nde tsjeè nga tsjá-la kjotjò Nainá. Xita koi, yaá síngàsòn-kò kjotjò xi tsjá-la Nainá ya i'nde tsjeè. ¹⁹K'e nga k'oa xan-nò, mìtsà xan-nò nga tjín-la okixi jñà xkòsòn kò tsojmì xi sinchát'aà-la. ²⁰Jñà 'én xi xan-nò, jñà kjotjò xi fiko jñà xita xi mikii beèxkon Nainá, jñà fiko-la inima ch'o-la neíj, mìtsà jè sobà Nainá. 'An, majìn-na nga ya síngàsòn-koo inima ch'o-la neíj. ²¹Mikii ndaà tjín, k'e nga jye 'yò vino xi ts'e Jesús, xi otíxoma-ná, ikjoàn s'ioo xi ts'e inima ch'o-la neíj. Tíkooá mikii ndaà tjín, k'e nga jye bichiodè inchrajín xi ts'e Jesús, ikjoàn bichiodè xi ts'e inima ch'o-la neíj. ²²¿A xi mejèn-nò sikjàn-là Nà'è-ná nga kàtachini? ¿A isaá tjín-nò nga'nó mì k'oa-ne Nainá?

Jè kinchátsjiaá ítjoán kjondaà ts'e xita xi kj'eíj

²³Tsò jñà xita: “Tjí'nde-né nita mé xi s'eén.” Kixíj kjoa tjí'nde-né, tanga mìtsà ngats'iì kjoa nga ndaà tjín. Tjí'nde-né nita mé kjoa xi s'eén, tanga mìtsà ngats'iì kjoa tsjá-ná nga'nó. ²⁴Mìtsà tà kjondaà tsajòn binchaàtsjiodè ítjòn, jè tinchátsjiodè ítjòn kjondaà ts'e xita xi kj'eíj.

²⁵Maá chinee nita mé yijo xi satíjna ya ñánda biyaá cho. Kì kii chjinanguio ñánda j'i-ne mé-ne nga mì ch'o koma-la kjohítsjeèn-nò. ²⁶Nga ts'eé Nà'è-ná jè nangui kò ngats'iì tsojmì xi tjín-la.

²⁷Tsà jngodè xita xi mikii mokjeiín-la 'én-la Nainá, kichja-nò nga kichikoo, tsà mejèn-nò nga onguió, chjinee yije-nò xi tsjá-nò. Kì mé xi chjinanguio nga mì ch'o koma-la kjohítsjeèn-nò. ²⁸Tsà jngodè xita xi kitso-nò: “Jñà tsojmì koi,

yaá kisinchaàt'aà-la xkòsòn.” Jè kjoa-la xita xi okitsò-nò, kì kii chine, mé-ne nga mì ch'o koma-la kjohítsjeèn-la. ²⁹Mitsà kjohítsjeèn tsajòn xi tìxan-nò, ts'eé xita xi okitsò.

Tanga tsà tjin i'nga xita xi skonangui nga kitso: “;Mé-ne mì tji'nde-na nga s'iaàn nita mé kjoa xi mejèn-na nga ta koi kjoa-la nga mì ch'o koma-la kjohítsjeèn-la xita xi kje'ei? ³⁰'An, tsà tsjaà-la kjondaà Nainá it'aà ts'e tsojmi xi kínee, mìkii ndaà tjin tsà ch'o kitso-la xita jñà tsojmi xi jye kàtsjaà-la kjondaà Nainá.” ³¹Tanga jñò, k'e nga bichioò ko tsà 'yò, nita mé kjoa xi 'nè, k'oaá s'in t'een nga jeya kàtjina Nainá. ³²Kì jé binchaàtsji-là jñà xita judío, ko xi mìtsà xita judío, ko jñà xita naxandá-la Nainá. ³³'An, k'oaá s'in s'iaàn yije koni s'in sasén-la xita xi kje'ei. Mitsà jè otsjià ítjoàn xi kjondaà ts'an, jè otsjià ítjoàn kjondaà ts'e xita xi kje'ei mé-ne nga kitjokàjìin-ne kjo'in.

11 ¹Koni s'in s'iaàn 'an nga kjingui-la Cristo, k'oa tis'in chjingui-ná.

Kó s'in skoexkón x'in-la jñà íchjín k'e nga chjat'aà-la Nainá

²Ndí 'ndsè ko tichjaá, ndaà 'nè-nò nga nìkítsjeèn it'aà ts'an ngats'iì kjoa xi s'iaàn; tikoà nìkitasòn kjotíxoma xi 'an kisikatoya-nò. ³Tanga mejèn-na nga kàtasijìin-nò nga jngodò ijngodò xita x'in, jè Cristo xi sko-la ma, ko jè chjoón, jè xita x'in xi sko-la ma, koni jè Cristo, jè Nainá xi sko-la ma. ⁴Tsà jngodò xita x'in xi títja sko k'e nga chjat'aà-la Nainá, o k'e nga chjaya 'én-la Nainá, mìkii beèxkón Cristo nga jè tijn sko-la. ⁵Tanga tsà jngodò chjoón, tsà mìkii bíjtsa sko k'e nga chjat'aà-la Nainá, o k'e nga chjaya 'én-la Nainá, mìkii beèxkón x'in-la nga jè tijn sko-la. K'oaá ngaya-la koni tsà kisijno-la. ⁶Tsà jngodò chjoón xi majìn-la bíjtsa sko, tikoá-ne kàtasijno-la tsja sko. Ko tsà masobà-la nga sijno-la, kàtítja sko. ⁷Jè xita x'in, mìkii tji'nde nga kiijtsa sko, nga k'oaá s'in 'ya-la koni Nainá, ko it'aà ts'e xita x'in, 'yaá-la kjoajeya-la Nainá; tanga it'aà ts'e chjoón 'yaá-la kjoajeya-la x'in-la. ⁸Jè x'in, mìtsà ya ítjokàt'aà-ne ts'e chjoón; jè chjoón xi it'aà ts'e xita x'in ítjokàt'aà-ne. ⁹Jè xita x'in, mìtsà kjoa ts'e chjoón kisindaà-ne; tanga jè chjoón, kjoa ts'e x'in kisindaà-ne. ¹⁰Koi kjoa-la jè chjoón tjinè-la nga kiijtsa sko, seña-né nga beèxkón x'in-la, mé-ne nga tikoà sko-ne jñà àkjale. ¹¹Tanga koni s'in tindaà-la Na'è-ná, tsà tsjin chjoón, mìkii tijn x'in; ko tsà tsjin x'in,

mikiì tǐjna chjoón. ¹²Koni s'ín komà nga jè chjoón, it'aà ts'e x'íin kisindaà-ne; tìkooá jè x'in, it'aà ts'e chjoón ts'iin. Tanga it'aà ts'e Nainá nchrobá yije-ne.

¹³Jñò, ndaà tìkítsjeèn: ¿A ndaà tǐn tsà mikiì tǐjtsa sko jñà íchjín k'e nga chjat'aà-la Nainá? ¹⁴Tijé-ne isò'nde, bénojmiya-ná nga kjoasobà-né k'e nga jè xita x'in síndojò tsja sko. ¹⁵Tanga ndaà tsejèn k'e nga jngoò chjoón xi ndojò kjoàn tsja sko. Kjoajeya ts'e-né. Koií xá kits'iì-la tsja-la nga ndojò kjoàn, mé-ne nga kǐijtsa-ne sko koni tsà payo. ¹⁶Tsà tǐn xita xi mikiì tǐjngoò ikon koni bixón-jen, k'oaá s'ín kàtasijiin-la, ngajen ko naxandá-la Cristo, nguì k'oaá s'ín 'nè-jen, tsjìn xi k'jeíí s'ín.


Kjoa xi mikiì ndaà tǐn k'e nga bichiaá koni s'ín tsakóya Cristo

¹⁷Nga tìkjii ìsa-nò, mikiì ndaà síkítsajna-nò, koií kjoa-la nga mikiì ndaà títsa'nè k'e nga maxkóya; ch'o títsa'nè. ¹⁸Jè kjoa xi tǐjna ítjòn it'aà tsajòn, k'oaá s'ín ki'nchrè, jñò xi naxandá-la Cristo 'mì-nò, k'e nga maxkóya, jò xó ya maà. Mejèn tsà mokjeíin-na tsà koií nachrjein-la tsà k'oaá s'ín títsa'nè. ¹⁹Ta xó k'oaá-la komat'in-nò nga s'eé xita xinguiòo xi síjòya-nò, mé-ne nga jcha-la yá-ne xi tǐn-la okixi. ²⁰K'e nga maxkóya nga bichioè, koni s'ín tsakóya Cristo, mìtsà kixi kjoa nga jè nìkítsjeèn-yaà koni s'ín komat'in Na'èn-ná k'e nga k'en. ²¹K'e nga bichioè, tǐn i'nga xita xi ítjòn kjèn tsojmì xi bijchóko; mikiì koña-la xíkjín nga tsjá itsé-la; skanda tǐn xi mach'i. Tanga jñà xita xi i'nga, imaá ijò-la nga mikiì tsjá itsé-la. ²²Jñò, ¿a tsjìn-nò ni'ya ñánda nga bichioè ko nga 'yò? ¿Mé-ne nachrjekàngui-nò xita naxandá-la Cristo koa nìsobà-là xita ima xi tsjìn-la tsojmì xi kine? K'e nga k'oas'ín 'nè, ¿kó s'ín xán-nò? ¿A ndaà síkítsajna-nò? Majìn, mikiì ndaà síkítsajna-nò.

K'e nga jè Na'èn-ná tsakjèn-ko xita-la k'e nga kòjñò

(Mateo 26:26-29; Marcos 14:22-25; Lucas 22:14-20)

²³Koni s'ín tsakóya-na Na'èn-ná, ti koií-ne xi 'an tsakoòya-nò. Jè nitjen k'e nga Na'èn-ná Jesús kitsobà'ñó xita, kiskoé inchrajín, ²⁴kitsjaà-la kjondaà Nainá, ikjoàn kisìxkoaya, kitsò: “Chjoé, jè-né xi yiyo-na nga títsjaà kjotjò nga kiyá xi kjondaà tsajòn. K'oa tǐ s'ín t'een nga tìxkoaya inchrajín, mé-ne nga síkítsjeèn-nò it'aà ts'an.” ²⁵K'oaá tǐs'ín kis'iin k'e nga



jye tsakjèn, kiskoé chĩtsín, kitsò: “Vino xi tjíya chĩtsín jè, jè jní-na xi síkixiya kjoa xitse xi bindaàjiin-ko-nò. Jñò, k'e nga ìjngodò ìjngodò k'a s'ioo, k'oaá s'ín t'een mé-ne nga síkĩtsjeèn-nò it'aà ts'an.”²⁶ K'e nga ìjngodò ìjngodò k'a kichiodò inchrájin jè, koa s'ioya vino chĩtsín jè, it'aà ts'eé kjoabiyaà-la Na'èn-ná kinókjoaya, skanda k'e nga kjoí ìjngodò k'a Cristo.

Mikii ma taxkí bichikoaá Na'èn-ná

²⁷Nita yá xita-ne xi kokjen inchrájin jè, o xi skoíya chĩtsín ts'e Na'èn-ná, tsà mikii skoexkón k'e nga kokjen, jé tíhótsji it'aà ts'e Na'èn-ná nga tíhochrjengui yijo-la ko jní-la. ²⁸Koí kjoa-la, ítjòn ndaà tikĩtsjeèn jiin inima-nò kós'ín titsajnakoo Nainá ko xita xinguiio. Iskan tichiodò inchrájin koa t'ioya chĩtsín ts'e Na'èn-ná. ²⁹Tsà yá xita xi kokjen inchrájin koa skoí vino xi tjíya chĩtsín, tsà mikii síkĩtsjeèn nga jè yijo-la Na'èn-ná, xita jè, kjo'ín tóbínè-la yijo-la. ³⁰K'oaá ma-ne kjin xita xinguiio xi ch'in bít'aà-la koa tjin xi indaákjoa títsajna, skanda jye kjò kjin biyaà. ³¹Tsà ndaà síkĩtsjeén kós'ín titsajnakoaá Nainá ko xita xinguiiá, Na'èn-ná mikii kjo'in tsjá-ná. ³²Tanga tsà jè Na'èn-ná tsjá-ná kjo'in, koi-né nga mejèn-la síkixiya-ná mé-ne mikii kokot'aà-ná kjo'in xi mikii fehet'aà nita kjé-ne xi tjoé-la jñà xita isò'nde xi mikii beèxkón Nainá.

³³K'oaá ma-ne jñò ndí 'ndsè k'e nga maxkóya nga bichiodò, chíñakjoa-là xinguiio. ³⁴Tsà tjin i'nga xi 'ñó ijò-la, tichiodò ni'ya-nò, mé-ne k'e nga kojkóya mi kjo'in tsjá-nò Na'èn-ná. Jñà kjoa xi i'nga xi tjin isa-nò, k'e kichokon-nò kíndaajñaá.

Kó s'ín t́jín kjoa chjine xi tsjá Inima Tsjeè-la
Nainá xi kjondaà ts'e naxandá-la

12 ¹Ndí 'ndsè kò tichjaá, 'an mejèn-na kàtasijìin-nò jñà kjoa chjine xi tsjá Inima Tsjeè-la Nainá.

²Jñò, ndaà t́jìin-nò k'e nga t́ikj'eè mokjeiín-nò 'én-la Nainá, yaá tsanguit'aà-là xkòsòn xi mìkìi ma chja nga xìn ndiyá kiiiko-nò nga mìtsà kixi kjoa nga Nainá. ³K'oaá xan-nò, niyá xita xi koma kítóso-la Jesús: “¡Ch'o kàtamatin!” tsà it'aà ts'e Inima Tsjeè-la Nainá tichja. Tíkooá tsà mìtsà nga'nò ts'e Inima Tsjeè-la Nainá tichja, mìkìi koma kítóso-la: “¡Jì-né Jesús xi otixomai!”

⁴Ya jìin naxandá-la Nainá, ḱjìn skaya kjoa chjine t́jín kjoa ts'e xá xi síkitasòn xita, tanga jè xi tsjá kjoa chjine, t́jè-ne Inima Tsjeè-la Nainá. ⁵Jñà xita, ḱjìn skaya xá t́jín-la nga s̀ixá-la Na'èn-ná, tanga t́jè-ne Na'èn-ná xi maxá-la. ⁶Ḱjìn skaya nga'nò t́jín kós'ín maxá, tanga t́jè-ne nga'nó-la Nainá xi síxájiin-la ngats'iì xita. ⁷Nga jngoò ìjngoò xita, tjoé-la jngoò kjoa chjine xi okó nga yaá t́jnajiin inima-la Inima Tsjeè-la Nainá mé-ne nga ngats'iì xita naxandá-la Nainá kochjeén-la kjondaà xi tjoé-la. ⁸Xi it'aà ts'e Inima Tsjeè-la Nainá t́jín xita xi 'biì-la 'én xi t́jín-la kjohitsjeèn; koa t́jín i'nga xi 'biì-la 'én xi t́jín-la kjoa chjine, nga t́jè-ne Inima Tsjeè-la Nainá tsjá. ⁹T́jín xi tjoé-la kjoachjine nga ndaà mokjeiín-la nga t́jè-ne Inima Tsjeè-la Nainá tsjá-la, tíkooá t́jín xi tjoé-la kjoachjine nga síndaà-ne xita xi xk'én, nga t́jè-ne Inima Tsjeè-la Nainá tsjá-la. ¹⁰T́jín xi tjoé-la kjoachjine nga ma-la s'ín kjoxkón xi ndaà t́jín, kò xi ma-la chja ngajo-la Nainá, kò xi machiya-la mé inima xi tísíxájiin inima-la xita xi chja. Kò t́jín xi tjoé-la nga ma-la chja 'én xi k'jeií tsò xi mì yá xita fìya-la, tíkoo t́jín xi ma-la síkatoya 'én xi k'jeií tsò xi mì yá xita fìya-la. ¹¹Tijè ta jngoó-ne Inima Tsjeè-la Nainá xi síxá it'aà ts'e ngats'iì kjoa ko nga síka'bí-la nga jngoò ìjngoò xita kjoachjine xi jè mejèn-la nga tsjá-la.

¹²Yijo tsaján, ḱjìn jchán skaya t́jín-la; tanga koni s'ín t́kjoò, ta jngoò ma-ne yijo. Naxandá-la Cristo, k'oaá tís'ín t́jín, ta jngoò ma-ne. ¹³Jñà xi xita judío kò xi mìtsà xita judío, xi xita chi'nda títajna kò xita xi títajnadeií ta jngoò ma-ne. Ngats'iaá jñá, tà ngàsòn komaá bautizar it'aà ts'e xi t́jè-ne

Injima Tsjeè-la Nainá nga jngoò naxandá-la Nainá komaá koni tsà jngoò yijo. Nga jngoò ijngoá, Nainá kitsjaà-ná xi tije-ne Injima Tsjeè-la.

¹⁴Jè yijo-ná, mìtsà tà jngoò skaya tjín-ne; kjin jchán skaya tíkjoòya. ¹⁵Tsà jè ndsokoaá kitso: “An, mìtsà tsja xita ma, mìtsà ya chjà-na jè yijo.” Mìtsà koi kjoa-la nga okitsò nga mì ya chjà-ne yijo. ¹⁶Tsà jñà líká kitso: “An, mìtsà xkon xita ma, mìtsà ya chjà-na jè yijo.” Mìtsà koi kjoa-la nga okitsò nga mì ya chjà-ne yijo. ¹⁷Tsà kóhokji yijo-ná, tsà nguì xkoaán koma, çkós'ín kiná'ya-ná? Tsà jè yijo-ná, tsà nguì líká koma, çkós'ín kijne-ná? ¹⁸Tanga Nainá nga jngoò ijngoò skaya yijo-ná, yaá kisikítsajna i'nde-la yijo-ná ñánda nga jè kjòmejèn-la. ¹⁹Yijo-ná tsà tà jngoò skoya koma, mì-la tsà yijo xi nguì tjingò. ²⁰Kixíí kjoa nas'ín kjin skaya tíkjoòya yijo-ná, tanga tajngoò ma-ne.

²¹Jñà xkoaán mìkiì koma kitsò-la jñà ndsaá: “Mikiì mochjeén-na.” Jè skoaá tikoá mìkiì koma kitsò-la jñà ndsokoaá: “Mikiì mochjeén-na.” ²²Tanga it'aà ts'e yijo-ná, tjín-né xi 'mì-lá nga chiba nga'ñó tjín-la tanga isaá ndaà mochjeén. ²³It'aà ts'e yijo-ná xi 'mì-lá nga mìkiì ndaà tsejèn, jñà-né xi nikakjá nikje mé-ne nga isa ndaà kotsejèn-ne. Bíjtsa'ma-né jè yijo-ná, jñà xi mìkiì tjí'nde-la nga jcha-la. ²⁴Mikiì mochjeén nga sijtsa'ma yijo-ná xi tsejèn. Nainá jye k'oas'ín tsibíndaà nga isa ndaà jchaxkón jè xi 'mì-lá nga isa chiba chjí-la, ²⁵mé-ne nga mì kojòya-ne. Ta saá nga jngoò ijngoò skaya katasíkinda xíkjin. ²⁶Tsà tjín jngoò skaya yijo-ná ñánda ijò ma, ok'ín yije-la xíkjin kóhokji nga ma ijò. Koá tsà tjín ñánda ndaà tíyaxkón, ndaá s'e yije-la kóhokji yijo.

²⁷Jñò, k'oaá ngaya-la koni yijo-la Cristo. Katjín, katjín xá xi kitjoé-nò ya jjiin naxandá-la Nainá. ²⁸Nainá k'oaá s'ín kiskòdsòn-la mé xá xi s'iin xita: jñà títsajna íjòn xita xi bíxáya-la Nainá; xi ma-ne jò, xita xi chjà ngajo-la Nainá; xi ma-ne jàn, xita xi okóya 'én-la Nainá. Tikoá tjín xi ma-la s'ín kjoaxkón xi ndaà tjín. Kò tjín xi ma-la síndaà-ne xita xi xk'én; tjín xi ma-la síchját'aà; tjín xi otíxoma mé kjoa xi koma; kò tjín xi chjà 'én xi kj'eíí tsò xi mì yá xita fiya-la. ²⁹Mìtsà ngats'iì nga ma bíxáya-la Nainá. Mìtsà ngats'iì nga Nainá chjà ngajo-la. Mìtsà ngats'iì nga ma-la okóya 'én-la Nainá. Mìtsà ngats'iì nga ma-la s'ín kjoaxkón xi ndaà tjín. ³⁰Kò mìtsà ngats'iì nga ma-la síndaà-ne xita xk'én. Mìtsà ngats'iì nga ma-la chjà 'én xi kj'eíí

tsò xi mì yá xitá fiya-lá. Mìtsà ngats'iì ma-lá síkatoya 'én xi kj'eíí tsò xi mì yá xitá fiya-lá. ³¹Tanga jñò, mochjeén-né nga tìnchátsjiod jñà kjoachjine xi ìsà ndaà tjín.

Tanga ì'ndeí 'aán kokoò-nò jngòò ndiyá xi ìsà ndaà tjín kó s'ín sijchá yijo-nò.

It'aà ts'e kjoatjòcha

13 ¹An, tsà ma-na chjà jñà 'én xi kj'eíí tsò xi chja xitá nas'ín jñà 'én xi chja àkjale, tanga tsà tsjìn-na kjoatjòcha, nímé chjí-lá; k'oaá ngaya-na koni jngòò kichá xi 'nó one, o koni jñà kichá tsjìn xi ch'o one k'e nga kaàkjòò. ²Tsà tsjìn-na kjoatjòcha, nímé chjí-na nas'ín ma-na chjà ngajo-lá Nainá, nas'ín machiya yije-na kjoa xi tjí'ma-lá Nainá; nas'ín ma yije-na kjoa chjine, nas'ín ndaà mokjeíín yije-na it'aà ts'e Nainá, skanda ma-na síkjaníyá-lá nindòò. ³Tsà sika'bíá yije tsojmì xi tjín-na nga kòkjen xitá ima, koa tsjaà kjotjoà yijo-na nga kiti xi kjondaà ts'e xitá xi kj'eíí, tanga tsà tsjìn-na kjoatjòcha, nímé sikkijne.

⁴Jè xitá xi tjín-lá kjoatjòcha, tjín-lá kjoatsetakòn nita mé kjoa-ne; tjín-lá kjondaà; mìkiì maxitakòn; mìtsà 'én 'nga chja; kò mìtsà tije ndaà síkíjna-ne yijo-lá; ⁵mìtsà taxki s'ín; mìtsà tà kjondaà ts'e ótsji; mìkiì taxki majti-lá; nímé kjoa bíngui takòn; ⁶mìtsà matsja-lá it'aà ts'e kjoa xi ch'o tjín, ts'eé kjoa kixi xi matsja-lá. ⁷Jè xi tjín-lá kjoatjòcha, síkjeíín yije-lá nita mé kjoa-ne, mokjeíín yije-lá, koña yije-lá, chíkjòakò yije-lá ngats'iì kjoa.

⁸Jè kjoatjòcha mìkiì kjoehet'aà. Tanga kijchò nachrjein nga mì tì yá xi kichja ngajo-lá Nainá, nga mì tì yá xi kichja-ne 'én xi kj'eíí tsò xi mì yá xitá fiya-lá kò nga mì tì yá xi tjoé-lá kjohítsjeèn xi tjí'ma-lá Nainá. ⁹Nga kj'eè tsà nguì ndaà tjiín yije-ná kjohítsjeèn xi tjí'ma-lá Nainá, kò kj'eè tsà nguì ndaà nokjoà ngajo-lá Nainá. ¹⁰Tanga k'e nga kijchò nachrjein nga kjoíí xi nímé chijat'aà-lá, yaá kjoehet'aà jñà kjoa xi ta chiba machiya-ná.

¹¹K'e nga sa chítia, k'oaá s'ín kichjà koni chja ixti, k'oas'ín kisikítsjeèn koni s'ín síkítsjeèn ixti, k'oas'ín kiskoòsòn-lá koni ixti. Tanga k'e nga jye kòjchínga, kisikíjna-ná kjoa ts'e ixti. ¹²Ì'ndeí, ta k'oaá s'ín 'yaá Nainá koni tsà chítsín jmà chítsejèn-yaá nga mìkiì ndaà tsejèn-ná. Tanga kijchò nachrjein

k'e nga ndaà kotsejèn-ná nga chí'aán Nainá. I'ndeí tã chibaá machiya-na, tanga kijchò nachrjein nga ndaà kochiya-na koni s'ín beèxkon-na Nainá.

¹³Ján kjoa tjin xi mìkii kjoehet'aà, jngoò kjoa nga mokjeín-ná it'aà ts'e Nainá, ijngoò nga chiñà-lá xi tjoé-ná, ijngoò nga s'e-ná kjoatjòcha. Jñà ingajàn kjoa koi, jè kjoatjòcha xi isa 'nó chjí-la.

Jè xi ma-la chja 'én xi kjeíí tsò

14 ¹Jè kjoatjòcha tanguítjìngui-là; tikoá mochjeén-né nga tìnchátsjiod jñà kjoachjine xi tsjá Inima Tsjeè-la Nainá. Kò jè xi isa 'nó mochjeén nga kinókjoa ngajo-là Nainá. ²Jngoò xita xi kjeíí tsò 'én xi chja, mìtsà taxki xita tíchja-la; Nainá tíchjat'aà-la. Nga mì yá xita fiya-la kó tsò 'én xi tíchja. Jñà 'én xi chja, ts'eé Inima Tsjeè-la Nainá nga tíchja'ma-né. ³Tanga jè xita xi chja ngajo-la Nainá, jñà xita naxandá-la Nainá chjajiin-la, mé-ne nga isa ndaà koma-la, isa ndaà k'ñójiiin-ne kjohítsjeèn-la koá isa ndaà sijje takòn-ne xita naxandá-la Nainá. ⁴Jè xita xi chja 'én xi kjeíí tsò xi mì yá xita fiya-la, ti yijo-laá tsjá nga'nó-la. Tanga jè xi chja ngajo-la Nainá, jñà xita naxandá-la Cristo tsjá-la nga'nó.

⁵'An, k'oaá s'ín mejèn-na tsà ngats'ioò koma-nò kinókjoaa 'én xi kjeíí tsò xi mì yá xita fiya-la. Tanga isaá-la ndaà tjin tsà koma-nò kinókjoa ngajo-là Nainá. Jè xi Nainá chja ngajo-la isaá 'nó chjí-la mì k'oa-ne koni jè xi chja 'én xi kjeíí tsò. Ta jngoò-la tsà tjin xita xi koma-la siikatoya 'én xi kjeíí tsò mé-ne isa ndaà s'e-la nga'nó xita naxandá-la Cristo.

⁶Ndí 'ndsè kò tichjaá k'oaá गया-la tsà 'an mejèn-na kjíkon-nò, tsà kjeíí tsò 'én xi kichjàko-nò xi mìkii na'yà-là, kós'ín kochjeén-nò. Ta jé-la tsà 'én-la Nainá sikíchya-nò, tsà kènojmi chiba-nò kjohítsjeèn xi ndaà tsò, tsà kichjàjiiin-nò 'én kixi, kò kokoòya-nò 'én xi ndaà tsò.

⁷Jñà chrjo-la música kò ní'nó xi tíhone tsà ngàsòn kjone, ¿kós'ín jcha-la ñá-laá xi tíhone nga tà ngàsòn tsò? ⁸Tsà jè chrjo trompeta-la xita kjojchán, tsà mìkii ndaà skindàya, ¿yá xita xi kítsajnandaà nga kjoí kjojchán? ⁹Jñò, k'oaá tis'in mat'ioòn tsà mìtsà 'én tsajòn kinókjoaa nga kjiya-la xita, ¿kó s'ín kiná'ya-la mé 'én xi titsanokjoà? Tà jjiin isén-la titsanokjoà. ¹⁰Kjìn jchán skoya 'én tjin nga tíjtsa isò'nde, tanga ngats'iì 'én tjin-la

kjohítsjeèn kó tsòya-ne nga jngoò ìjngoò skoya. ¹¹ 'An, tsà mìkiì fiya-na kó tsò 'én xi tíchjā jngoò xīta, xīta xìn nanguií kōma-na. Kō jè xīta xi tíchjā, k'oaá tī kōma-lā it'aà ts'an koni xìn nanguií ì'nde-na. ¹² Jñò, nga mejèn-nò jñà kjoachjine xi tsjā Inīma Tsjeè-lā Nainá, mochjeén-né nga ìsā ndaà tīnchátsjioò jñà kjoachjine xi kōma ndaà sīchjāt'aà-lā naxandá-lā Cristo mé-ne nga ìsā tse nga'ño s'e-lā.

¹³ K'oaá ma-ne jè xīta xi kj'eíí tsò 'én xi chjā xi mì yá xīta fiya-lā, kátasjét'aà-lā Nainá nga kátatsjā-lā kjoachjine mé-ne kōma sīkatoya-ne 'én xi chjā. ¹⁴ 'An, k'e nga chjāt'aà-lā Nainá nga kj'eíí tsò 'én xi tíchjā xi mìkiì fiya-na, tà jè tíchjā Inīma Tsjeè-lā Nainá xi tījnajīn inīma-na. Tānga jè kjohítsjeèn-na, nīmé kjondaà sākò-lā nga mìkiì fiya-na kó s'ín tíchjā. ¹⁵ 'An, ¿mé xi s'iaàn? Mochjeén-né nga kichjāt'aà-lā Nainá 'én xi bíjīn inīma-na Inīma Tsjeè-lā Nainá. Tīkoá mochjeén-né nga kichjākoá Nainá 'én xi ndaà fiya-na. K'e nga seè, tīkoá mochjeén-né nga seè sò xi bíjīn inīma-na Inīma Tsjeè-lā Nainá. Tānga tīkoá mochjeén nga seè sò xi ndaà fiya-na. ¹⁶ K'e nga jeya nīkījīn Nainá, tsà tà jñà 'én nokjò xi bíjīn inīma-lè Inīma Tsjeè-lā Nainá, tsà kjī'nchré-lā 'én-lè jñà xīta xi mìkiì fiya-lā, mìkiì kōma kīso: “K'oaá s'ín kātama”, nga mìkiì fiya-lā kó tsò 'én xi nokjò. ¹⁷ Okixi-né, kjondaà xi t'ì'biì-lā Nainá, ndaà tīn, tānga jñà xīta xi i'nga, nì mé nga'ño tísakó-lā nga mìkiì fiya-lā. ¹⁸ 'An, tsjaà-lā kjondaà Nainá nga ìsā ndaà ma-na chjā 'én xi mì yá xīta fiya-lā mì k'oa-ne koni jñò. ¹⁹ Tānga k'e nga yā tījnajīn-lā xīta naxandá-lā Cristo, ìsā ndaà tīn tsà tà 'òn 'én kichjā xi tīn-lā kjohítsjeèn nga kokòya-lā xīta, mì k'oa-ne tsà te jmī 'én kichjā xi kj'eíí tsò xi mìkiì 'nchréya-lā xīta.

²⁰ Ndí 'ndsè kō tichjaá, kì k'oaá s'ín nīkītsjeèn koni ìxti. Tānga ts'e kjoā xi ch'o tīn, k'oaá s'ín t'een koni ìxti xi kj'ee ndaà machiya-lā. Tānga it'aà ts'e kjohítsjeèn-nò, k'oaá s'ín t'een koni xīta xi jye ndaà machiya-lā. ²¹ Xojon-lā Nainá k'oaá s'ín tíchjā nga tsò: “Nga kichjā-lā naxandá-na, xīta xìn nanguií sīkjeén xi kj'eíí 'én chjā nga kōma kichjā-lā. Tānga nas'ín k'oaas'ín s'iaàn mìkiì kjī'nchréñijon-na, tsò Na'èn-ná.” ²² K'e nga nokjoá 'én xi kj'eíí tsò xi mì yá xīta fiya-lā, kjoxkón okó-lā Nainá jñà xīta xi mìkiì mokjeíin-lā, mītsà ts'e xīta xi mokjeíin-lā. Tānga k'e nga nokjoà ngajo-lá Nainá, ts'ee xīta

xi mokjeiín-la, mìtsà ts'e x̄ita xi mìkiì mokjeiín-la. ²³ J̄nà x̄ita naxandá-la Cristo k'e nga maxkóya, tsà ngats'iì nga kj'eíí 'én kichja xi mì yá x̄ita fiya-la, tsà kjoahas'en jngoò x̄ita xi taxkì x̄ita xi mìkiì mokjeiín-la 'én-la Nainá, k̄itso-né: “J̄nà x̄ita koi, x̄ita ská-né.” ²⁴ Tanga tsà ngats'ioò nga 'én-la Nainá titsanokjoáya ngajo-lá, tsà kjoahas'en jngoò xi taxkì x̄ita xi mìkiì mokjeiín-la 'én-la Nainá, k'e nga kji'nchré-nò, k̄okjeiín-la k̄o kochiyaá-la nga x̄ita jé-né. ²⁵ Jè kjoa xi tíjna'ma j̄iìn inima-la, jchaá-la; k̄o jè x̄ita, kosijna-xkó'nchi-la Nainá nga skoexkón; k̄okjeiín-la nga kixì kjoa nga ya tíjnaj̄iìn-nò Nainá.

**Okixì xi kitsjaà Pablo kó s'iìn x̄ita k'e nga
maxkóya nga jeya síkijna Nainá**

²⁶ J̄nò ndí 'ndsè k̄o tichjaá, ¿kó s'ín fiya-nò j̄nà 'én koi? Tsòyaá-ne, k'e nga maxkóya nga jeya n̄ikijna Nainá, t̄jín i'nga x̄ita x̄inguioo xi seè-la Nainá; t̄jín i'nga xi ma-la okóya 'én-la Nainá; t̄jín xi ma-la b̄énojmí 'én xi jye tsakó-la Nainá; t̄jín xi chja 'én xi kj'eíí tsò xi mì yá x̄ita fiya-la; t̄ikoáá t̄jín xi ma-la síkatoya 'én xi kj'eíí tsò. Ngats'iì xá koi, k'oaá s'ín k̄atabitason mé-ne nga isa ndaà s'e-la nga'n̄o inima-la j̄nà x̄ita naxandá-la Nainá. ²⁷ Tsà t̄jín x̄ita xi ma-la chja 'én xi kj'eíí tsò xi mì yá x̄ita fiya-la, tà jò k̄o tsà jàn kichja; tanga ta ìjngoò ìjngoò kichja; k̄o jngoò xi s̄ikatoya 'én koi. ²⁸ Tsà tsjìn x̄ita xi ma-la síkatoya, tà jyò k̄atitsajna nga nguixk̄on naxandá-la Cristo, t̄ikoáá-ne tà j̄iìn inima-la k̄atichjako Nainá. ²⁹ K'oaá t̄is'ín t̄jín ts'e x̄ita xi chja ngajo-la Nainá, tà jò-ne k̄o tsà jàn xi kichja. J̄nà x̄ita xi i'nga, tà kji'nchré-né; ta s̄ingásòn-kjodé-ne a ndaà t̄jín, o xi maj̄in-né. ³⁰ J̄nà x̄ita xi t̄itsajna, tsà k̄itjok̄aj̄iìn jngoò x̄ita xi Nainá s̄ikichiya-la 'én xi mejèn-la nga kichja, jè x̄ita xi t̄ichjaya t̄ikoáá-ne ta jyò k̄atijna, k̄atatsjá'nde-la nga jè k̄atichja. ³¹ K'oaá ma-ne, ngats'ioò xi ma-nò nokjoà ngajo-la Nainá komaá kinókjoaa nga ìjngoò ìjngoò-nò mé-ne nga isa ndaà koma-nò k̄o isa ndaà kotsja-nò ngats'ioò. ³² J̄nà x̄ita xi ma-la chja ngajo-la Nainá, mochjeén-né nga t̄ijnà skósòn-la kós'ín kichja. ³³⁻³⁴ Nga Nainá, jè xi mejèn-la nga s'e kjoa'nchán, maj̄in-la nga kjoasiì s'e.

J̄nà íchjín, jyò k̄atitsajna, koni ma ngats'iì naxandá-la Cristo n̄ánda maxkóya x̄ita-la; mìkiì t̄jín'nde nga kichja; ndaà k̄ata'nchréñijon koni s'ín t̄ichja k̄jotíxoma. ³⁵ Tsà mé kjoa xi

mejèn-là nga skoe, yaá ni'ya-là kàtakjònangui-là x'in-là. Mikiì ndaà tjin tsà jngòò chjoón kichjajìin nãnda maxkóya xita naxandá-là Nainá.

³⁶ ¿A k'oaá s'in nikítsjeèn nga ta it'aà tsajòn kisindaà 'én-là Nainá? ¿A k'oaá ma-nò tsà ta jñò-nó xi kitjoé-nò? ³⁷ Tsà tjin i'nga xita xinguiòo xi k'oas'in síkítsjeèn nga ma-là chja ngajo-là Nainá, o xi ndaà machiya-là kjohítsjeèn-là Inima Tsjeè-là Nainá, k'oas'in kàtakixiya-là nga jñà 'én xi tikjiì-nò, kjotixoma ts'eé Nà'èn-ná. ³⁸ Tsà tjin xita xi mikiì sasén-là koni s'in okòdya-nò, tikoáá Nainá mikiì sasén takòn xita jè.

³⁹ Ndí 'ndsè kò tichjaá, k'oaá s'in 'nó tinchátsjioò nga tìnókjoa ngajo-là Nainá; tanga kì bitsajna ikòn-là jñà xi ma-là chja 'én xi kje'íí tsò xi mì yá xita fiya-là. ⁴⁰ Tanga ngats'iì kjoa koi, nguì ndaà t'een, kixi tanguíkoo.

K'e nga jaáya-là Cristo

15 ¹ I'ndeì ndí 'ndsè kò tichjaá, 'an mejèn-na nga síkítsjeèn-nò jè 'én ndaà-là Nainá xi kjoa ts'e Cristo xi 'an kichjàyajiìn-nò xi kichjoétjò kò nga kixi titsajnakoo. ² Jè 'én ndaà-là Nainá xi kjoa ts'e Cristo xi koma kochrjejiìn-nò kjo'in tsà kixi titsajnakoo skanda i'ndeì koni s'in nga kichjàyajiìn-nò nga tisa ítjòn; tsà majìn, nímé chjì-là nga kòkjeiìn-nò.

³ Jè kjoa xi isa 'nó tjin, jè-né nga kos'in tsakòdya-nò koni tjin xi 'an kitjoé-na, nga jè Cristo k'en ngajo-ná xi kjoa ts'e jé-ná nga k'oaá s'in tichja Xojon-là Nainá; ⁴ nga ksilhijiìn, koa nga ijchò jàn nachrjein jaáya-là, koni s'in tichja Xojon-là Nainá. ⁵ K'e nga jaáya-là, tsakó-là yijo-là jè Cefas [tijè-ne Pedro], ikjoàn tsakó-là yijo-là jñà xita-là xi i'nga, ya tejò ma-ne kò Pedro. ⁶ Xi komà iskan, tsato 'òn sindo ma-ne xita 'ndsè xi títsajnajtín nga tsakó-là yijo-là. Jñà xita koi, tjin i'nga xi jye k'en, tanga kjìn ma xi tákó títsajnakon skanda i'ndeì. ⁷ Ikjoàn tsakó-là yijo-là jè Jacobo. Xi komà iskan tsakó yije-là yijo-là jñà xita-là xi tsibíxáya-là.

⁸ Xi jyehet'aà-ne, ikjoàn 'aán tsakó-na yijo-là. 'An, k'oaá s'in ngaya-là koni tsà jngòò ki'ndí xi mì jé nachrjein kits'iìn koni s'in chíya nachrjein-là. ⁹ 'An-ná xi isa 'nó nangui tijna-là kóhotjín jñà xita xi tsibíxáya-là Jesús. Skanda mikiì ok'in-na nga k'oas'in k'oín-na; nga 'aán kiitjingui kondra-là jñà xita naxandá-là Cristo. ¹⁰ Tanga jè kjondaà-là Nainá ndaà

tsasikò-na; k'oaá komà-ne nga 'an tsibíxáya-na. Jè kjondaà-la, mìtsà tà kjotjò kitsjaà-na. Tanga 'an, isaá 'nó kisixá mì k'oa-ne koni ngats'iì xita-la xi i'nga. Kixií kjoa, mìtsà nga'nó ts'an, kjondaà ts'eé Nainá. ¹¹Tsà 'an-ná, kò tsà jñà xita-la xi i'nga xi ndaà síxá, tanga jè xi chjí-la nga k'oa s'ín nokjoàya-jen, koa jñò, k'oaá s'ín mokjeiín-nò.

K'e nga kjoaáya-la jñà xita xi jye k'en

¹²K'oaá s'ín tínokjoáya nga jè Cristo jaáyajiin-la xita xi jye k'en, tanga, ¿mé-ne tjin i'nga-ne xita xinguiqo xi tsò: “Jñà xita xi jye k'en mì tì kiì kjoaáya-la.”? ¹³Tsà mìkiì kjoaáya-la xita xi jye k'en, tikoáá jè Cristo, mì-la tsà kixi kjoa nga jaáya-la. ¹⁴Tsà mìkiì jaáya-la Cristo, jñà 'én xi nokjoàya-jen nímé-la chjí-la, tikoáá nímé-la chjí-la koni s'ín mokjeiín-nò. ¹⁵Tikoáá ngajen, xita ndisoó kítkòkàngui-jen it'aà ts'e Nainá, nga k'oaá s'ín nokjoàya-jen 'én-la Nainá nga bixón-jen: “Jè Nainá kisikjaáya-la Cristo.” Nga tsà jñà mik'en mìkiì kjoaáya-la, mì-la tsà kixi kjoa nga kisikjaáya-la Cristo. ¹⁶Tsà jñà xita xi jye k'en mìkiì kjoaáya-la, tikoáá jè Cristo mì-la tsà kixi kjoa nga jaáya-la. ¹⁷Jè Cristo, tsà mìkiì jaáya-la, nímé-la chjí-la koni s'ín mokjeiín-nò it'aà ts'e, tákó yaá-la titsajnajñòò jé-nò. ¹⁸Tikoáá jñà xita xi jye k'en nga kòkjeiín-la it'aà ts'e Cristo, jngòò k'aá-la kichijà, tsà mì jaáya-la Cristo. ¹⁹Jè kjoa xi chiñà-lá it'aà ts'e Cristo, tsà tà íí isò'nde kjoehet'aà, jñá-la xi nguì xita ima 'mì-ná kó ngats'iì xita xi tjin isò'nde.

²⁰Tanga nguì kixií kjoa nga jè Cristo jaáyaá-la it'aà ts'e kjoa biyaà. K'oaá ngaya-la koni tsojmì xi majchá ítjòn, nga jè Cristo jaáya ítjòn-la ngats'iì xita xi iskan kjoaáya-la [nga mì tì kiì kiyá-ne]. ²¹Koni s'ín komà nga it'aà ts'e jngòò xita kjòts'ia nga biyaà xita, k'oaá tis'ín komà nga it'aà ts'e jngòò xita j'iì nga kjoaáya-la xita xi jye k'en. ²²Koni s'ín ma nga biyaà ngats'iì xita xi it'aà ts'e tje-la Adán kits'iin, k'oaá tis'ín ma nga kjoaáyaá-la ngats'iì xita xi it'aà ts'e Cristo ts'iin xitse-ne. ²³Tanga jngòò ijngòò 'ncha ndiyá-né nga kjoaáya-la koni s'ín oko-la. Jè Cristo, tjna ítjòn nga jaáya-la; k'e nga kjoíí ijngòò k'a Cristo, k'eé kjoaáya-la xi xita ts'e. ²⁴Cristo, ítjòn siikjehesòn ngats'iì xi kondra fi-la, ngats'iì xi titsajna ítjòn, xi tjin-la nga'nó kò xi otixoma. Ikjoàn jè Cristo siingatsja kjotixoma-la Nainá xi Na'èn-ná ma; k'eé kjoehet'aà isò'nde.

²⁵ Mochjeén-né nga jè Cristo kàtatíxoma skanda k'e nga jye s̀ikítsajngangui yije ndsokò j̀nà xi kondra-la. ²⁶ Kò jè kondra-la xi fehet'aà-ne nga chija, jé kjoa biyaà. ²⁷ Nìtā mé xi t̀jín, Nainá, yaá kisíkítsajngangui yije ndsokò Cristo. Jè tíhotíxoma yije-la. Tanga mìtsà tsò-ne kjoa nga jè Nainá, yaá t̀jngangui ndsokò Cristo. Nga jè sobá Nainá xi kisíkítsajngangui ndsokò nìtā mé xi t̀jín. ²⁸ K'e nga jye ya t̀tsajngangui yije ndsokò Cristo nìtā mé xi t̀jín, jè Cristo, nga Ki'ndí-la Nainá ma, t̀ikoáá nangui s̀ikíjina yijo-la nga nguixkon Nainá nga jè sobá Nainá tsibítsajngangui ndsokò Cristo nìtā mé xi t̀jín, mé-ne nga jè Nainá jngod k'aá jè kíjina ítjòn-la nìtā mé kjoa-ne.

²⁹ Tanga tsà j̀nà xìtā xi jye k'en mì tì kii kjoaáya-la, j̀nà xìtā xi it'aà ts'e mik'en ma-ne bautizar, ¿kó s'ín síkítsjeèn? ¿Mé-ne it'aà ts'e mik'en ma-ne bautizar, tsà kixì kjoa nga mì tì kii kjoaáya-la xìtā? ³⁰ Kò ngajen, ¿mé kjoa-ne nga nachrjein nchijòn binchaxkón-lajen yijo-najen, tsà mì tì kii kjoaáya-la xìtā? ³¹ Ndí 'ndsè kò tichjaá, k'oaá xan-nò nga nguì kixì kjoa nga nachrjein nchijòn t̀jín-na kjoxkón tsà ya kiyá, koni s'ín nga nguì kixì kjoa nga matsja-na it'aà tsajòn nga ngàsòn mokjeiín-ná it'aà ts'e Na'èn-ná Jesucristo. ³² Tsà tà j̀nà kjoa ts'e isò'nde-né nga kiskaàn-koa xìtā koni tsà xa ján Éfeso, ¿mé xi kisikijne? Tsà j̀nà xìtā xi jye k'en mì tì kii kjoaáya-la, t̀ikoáá-ne: “Kichiaá, s'ioáá nga nchijòn-lè kiyá-ná.”

³³ Kì yá xìtā xi konachan-nò it'aà ts'e kjoa koi. Nga t̀jín jngod 'én xi tsò: “J̀nà xìtā xi tsajahitakoáá xi mìkii ndaà s'ín, j̀nà síkíts'ón-jiin kjoa xi ndaà t̀jín koni s'ín tìtsanjchá yijo-ná.” ³⁴ Ndaà t̀ikítsjeèn it'aà ts'e kjoa koi; kì tà tsjaà jé binchaàtsjiod. Nga t̀jín i'nga xìtā xinguiqo xi mìkii beèxkon Nainá. K'oaá xan-nò mé-ne nga kàtasobà-nò.

Kó kjoàn koma mik'en k'e nga kjoaáya-la

³⁵ Tsà koi nachrjein-la t̀jín i'nga xìtā xi tsò: “¿Kós'ín koma nga kjoaáya-la xìtā xi jye k'en? ¿Kó kjoàn yijo xi kítjokàjiin-ko?”

³⁶ ¡Mé tà t̀ondò-nò! K'e nga 'bè tje, j̀nà nojmé nga sihijiin, biyaà-né, mé-ne nga kiso xitse-ne jno, nga ìjngod k'a kítsajnakon. ³⁷ K'e nga 'bè tje, mìtsà j̀nà xi jye jno bitjee; tà j̀nà nojmé bitjee, o xi trigo-né. ³⁸ Tanga jè Nainá, k'oaá kjoàn s'ín koni s'ín mejèn-la; k'oaá kjoàn s'ín nga jngod ìjngod skaya xojmá koni kjoàn tje-la. ³⁹ J̀nà yijo, mìtsà ngàsòn kjoàn. Yijo-la

xita, kj'eíí kjoàn; yijo-la cho, kj'eíí kjoàn; yijo-la tin, kj'eíí kjoàn; yijo-la nise, kj'eíí kjoàn. ⁴⁰Koni choòn i isò'nde nga tjín yijo xi kj'eíí s'ín tsejèn, k'oaá ti choòn ngajmìi nga tjín xi kj'eíí s'ín tsejèn. Mìtsà ta ngásòn tsejèn xi tjín ngajmìi ko xi tjín isò'nde. ⁴¹Jè ts'oi kj'eíí s'ín tsejèn, jè sá kj'eíí s'ín tsejèn, jñà ni'ño kj'eíí s'ín tsejèn. K'a kj'eíí, k'a kj'eíí s'ín tsejèn nga jngodè ijngodè skoya.

⁴²K'oaá tis'ín ma nga kjoaáya-la xita xi jye k'en. Jè yijo xi sihiijìn, bits'on-né, tanga jè yijo xi kjoaáya-la, mì ti kii kīts'ón-ne. ⁴³Sihijijìn-né xi nímé chjí-la; jè xi kjoaáya-la jeya-né. Xi sihiijìn, yijo indaà-né; xi kjoaáya-la tjín-la nga'ño. ⁴⁴Jè yijo xi sihiijìn, taxki yijo-né, ts'e isò'nde-né. Yijo xi kjoaáya-la, yijo xitse-né, ts'ée Inimá Tsjeè-la Nainá. Tjín xi taxki yijo, tikoa tjín xi tsjá Inimá Tsjeè-la Nainá.

⁴⁵K'oaá s'ín tíchja Xojon-la Nainá nga tsò: “Jè xita x'in tjòn xi ki'mi Adán, jngodè xi xita komà xi tsibìjnakon.” Tanga [jè Cristo], jngodè inimá xi síkítsajnakon xita, nga jè j'iì ngajo-la Adán nga jyehet'aà-ne kjoa. ⁴⁶Tanga jè xi inimá, mìtsà jè j'iì ítjòn; jè j'iì ítjòn xi taxki yijo ts'e isò'nde, iskaán j'iì xi inimá. ⁴⁷Jè xita x'in xi tjòn, i it'aà nangui ts'e; ni'ndeé kisindaà-ne. Jè xita x'in xi ma-ne jò, ngajmìi ts'e, yaá inchrobà-ne, [nga jè xi Na'è-ná]. ⁴⁸Ngats'iì xita xi i isò'nde ts'e, k'oaá kjoàn yijo-la koni kji ts'e Adán nga ni'ndeé kisindaà-ne. Ngats'iì xi ngajmìi kítsajna, k'oaá kjoàn koma yijo-la koni kji ts'e Cristo xi ngajmìi inchrobà-ne. ⁴⁹I'ndeí, jñá, k'oaá kjoàn tsejèn yijo-ná koni kji xi ni'ndeé kisindaà-ne; nga komà iskan, k'oaá kjoàn kotsejèn yijo-ná koni kji xi ngajmìi j'iì-ne.

⁵⁰Ndí 'ndsè, k'oaá xan-nò jè yijo-ná nga jní tjín-la mìkii ma kjoahas'en-jijìn ñánda tíhotíxoma Nainá. Tikoaá jè yijo-ná xi bi'ndoya mìkii ok'in-la nga ya kjoahas'en-jijìn ñánda tjín xi mìkii bi'ndoya. ⁵¹Kènojmi jngodè-nò kjoa'ma ts'e Nainá: Jñá xi xita-la Cristo 'mì-ná, mìtsà ngats'iaá nga kiyá, tanga ngats'iì-ná ta jngodè tjò kjoatjìya-ná, ⁵²k'oaá ngaya-la koni k'e nga tsíx'aá koa bíchjoá xkoaán, tik'eé-ne nga skindàya chrjo trompeta xi fehet'aà-ne. K'e nga kjone chrjo trompeta, jñà mik'en kjoaáya-la, mì ti kii ki'ndo-ne nitá kjé-ne. Koa jñá kjoatjìya-ná. ⁵³Jè yijo-ná nga biyaà ko nga bi'ndo, mochjeén-né nga tjoé jngodè-la yijo xi mì ti kii kiyá-ne ko mì ti kii ki'ndo-ne nitá kjé-ne. ⁵⁴K'e nga k'oas'ín koma nga jè yijo-ná tjoé

jngoò-la yijo xi mì tì kiì kiyá-ne kò mì tì kiì kì'ndo-ne nìta kjé-ne, k'eé kítasòn koni s'ín tíchja Xojon-la Nainá nga tsò: “Jè kjoa xi síkijne jngoò k'aá síchija kjoabiyaà. ⁵⁵Jì xi kjoa biyaà 'mì-lè, ¿nándá-ne nga kinikijni? ¿Nándá tíjna na'yá-lè xi ma-la sík'en xítà?” ⁵⁶Jè na'yá xi t́jín-la kjoa biyaà, jé kjoa ts'e jé. Kò jè nga'nó xi t́jín-la jè kjoa ts'e jé, jé kjoat́xoma. ⁵⁷Ndaà chj́-la Nainá nga jè tsjá-ná nga'nó xi it'aà ts'e Jesucristo xi ot́xoma-ná nga nìkijne-lá kjoa biyaà kò kjoa ts'e jé.

⁵⁸Jñò ndí 'ndsè xi matsjake-nò, kixi t́tsajna. Niyá xi sìkijat́jya-la kjoht́sjeèn-nò. Kjit'aà nachrjein isa 'nó t́xá-là Na'èn-ná. Nga t́jiin-nò nga jè xá xi 'nè xi ts'e Na'èn-ná, mìtsà tà kjojtò.

Ton xi maxkót'aà-la jñà xítà naxandá-la Cristo

16 ¹Jè ton xi maxkót'aà-la xítà naxandá-la Cristo, k'oas'ín t'een koni s'ín kixan-la xítà naxandá-la Nainá ján nangui Galacia. ²Jñò, nga jngoò ĺjngoò, nga jiin jiin nachrjein k'e nga tahàngo, titjò chiba ton-nò koni s'ín machikon-t'ioòn, mé-ne nga mì k'e kíxkó-nò k'e nga 'an xi kójchoa. ³K'e nga kijchokon-nò ya Corinto, síkasén ján Jerusalén xítà xi jñò chjaajñò. Tsjaà-la xojon carta nga kjiko jè ton xi maxkót'aà-nò. ⁴Tsà mochjeén nga t́kōa 'an kjián, kōmaá kjiko-na jñà xítà koi.

K'e nga kisikítsjeèn Pablo nga kjoj ján Corinto

⁵Mejèn ḱjikon-nò k'e nga jye kjoáhatōaá ján nangui Macedonia, nga k'oaá s'ín t́jindaà-na nga ya kjoáhatōaá mé-ne nga ikjoàn kijcho-na Corinto. ⁶Tsà kōma ya kótijnako chiba nachrjein-nò, kò tsà koif nachrjein-la nga ya kótijnako-nò skanda k'e nga kjoehet'aà nachrjein-la chon 'nchán, mé-ne jñò kōma síchját'aà-ná k'e nga tsà nándá kjián nga kōma iskan. ⁷Majín-na nga tà jngoò t́jò skotsejèn-nò; jè xi mejèn-na nga ḱjìn nachrjein kótijnako-nò, tsà Nainá mejèn-la nga tsjá'nde-na. ⁸I kótijna naxandá Éfeso skanda nachrjein ts'e s'eí Pentecostés, [jè s'eí xi bitjo k'e nga jye bijchó icháte nachrjein nga bitjo s'eí Paxkō]. ⁹Ndaà títjo'nde-na nga tís'iaàn xá-la Nainá xi 'nó ndaà t́bitasòn, nas'ín 'nó ḱjìn ma-ne xítà xi kondra t́tsajna-na.

¹⁰Tsà kijchòkon-nò jè Timoteo, chítsejèn-là nga tsja kàtas'e-la nga kijnako-nò nga mì yijo-la kinchaxkón-la, nga tikoá xá-la Nainá tís'ín koni 'an. ¹¹K'oaá ma-ne, kì nachrjenguiod jñò, tã saá tichját'aà-là nga 'nchán kàtjanchrobákon-na; 'an, tíkoñaá-la kò xitã 'ndseé xi i'nga.

¹²'An 'nò tsibìtsi'ba-la jè 'ndsè Apolos, nga katahijtakò jñà xitã 'ndseé xi tijnè nga kjikon-nò, tanga majìn-la nga fi; k'eé-la kjoì k'e nga kò'a-la.

¹³Ndaà titsajnakon. 'Nó kixi titsajnakoo jè 'én xi mokjeiín-nò. Kì yá xi tsakjoòn-là, kàtas'e-nò nga'nó. ¹⁴Ngats'iì kjoá xi 'nè, koo kjoatjòcha-nò k'oa t'een.

¹⁵Jñò ndí 'ndseé kò tichjaá, jyeé tíjiin-nò nga jñà xitã ni'ya-la Estéfnas, jñà kòkjeiín ítjòn-la 'én-la Cristo ya nangui Acaya. Jñà xitã koi, k'oaá s'ín bínè-la yijo-la nga jñà xitã naxandá-la Cristo sìchját'aà-la. ¹⁶Ndí 'ndsè, bìtsi'bà-nò nga tiná'yañijon-là xitã xi k'oas'ín síxá koni jñà xitã koi, kò ngats'iì xitã xi mìkìlì bijta-la nga síxá-la Nainá. ¹⁷Matsja-na nga j'iikon-na Estéfnas, Fortunato kò Acaico [nga jñò kinikasén], nga jñà j'iì síkitasòn xi jñò mìkìlì komà kinítasòn nga inchrobàchon-ná. ¹⁸Jñà j'iì síje ikon-na kò tsajòn. K'oaá ma-ne jchaxkón jñà xitã xi k'oas'ín s'ín koni jñà xitã koi.

Pablo síhixat'aà naxandá-la Cristo

¹⁹Jñà naxandá-la Cristo xi titsajna nangui Asia síhixat'aà-nò. Jè Aquila kò Priscila kò xitã naxandá-la Cristo xi bixoña ya ni'ya-la, it'aà ts'e Nà'èn-ná ndaà síhixat'aà-nò. ²⁰Ngats'iì xitã 'ndseé, síhixat'aà-nò. Jñò tìixat'aà nga jngod òjngod xitã xinguiod nga kò inìma-nò.

²¹'An, xi Pablo 'mì-na, tìsìhixat'aà-nò nga kò ndsaa tìkjiì-nò xojon jè.

²²Tsà tjin xitã xi mìkìlì matsjakeè Jesucristo xi otíxoma-ná, jè xitã neí kàtjiko. Nà'èn, jì nìton nchroboí.

²³Jè kàtijnako-nò kjondaà-la Jesucristo xi otíxoma-ná.

²⁴Kjit'aà nachrjein kàtas'e-nò kjoatjòcha-na nga jè Cristo Jesús titsajnakoaá. K'oaá s'ín kàtama.